

MESYUARAT KEDUA, PENGGAJ KEEMPAT
PARLIMEN KEEMPAT BELAS
2021

HARI ISNIN : 13 DISEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 6, 9, 14 HINGGA NO. 42)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
(SELAYANG)**

TARIKH : 13 DISEMBER 2021 (RABU)

SOALAN

Minta **MENTERI KANAN PERTAHANAN** menyatakan :-

- (a) sama ada AUKUS akan membawa kepada perlumbaan senjata Sino-AS yang menjadikan Asia Pasifik kawasan konflik; dan
- (b) bagaimana prinsip ASEAN Zon Keamanan, Kebebasan dan Berkecuali (ZOPFAN) boleh dikekalkan.

JAWAPAN

Tuan Yang di-Pertua,

Penubuhan *Trilateral Security Partnership* Australia-United Kingdom-United (AUKUS) yang dibentuk pada 15 September 2021 adalah merupakan kerjasama dalam teknologi yang melibatkan antara lain program perolehan kapal selam berkuasa nuklear oleh Australia dan serta bidang-bidang kerjasama lain seperti keupayaan siber, kecerdasan buatan dan teknologi kuantum.

Dari aspek implikasi AUKUS terhadap perlumbaan senjata dan penyebaran senjata nuklear pula, suka saya jelaskan walaupun AUKUS ini tidak menyatakan sebarang elemen penggunaan senjata nuklear, Malaysia sentiasa menekankan prinsip untuk mengekalkan ASEAN sebagai zon bebas senjata nuklear berdasarkan Perjanjian Zon Bebas Senjata Nuklear Asia Tenggara (*Southeast Asia Nuclear Weapon Free Zone-SEANWFZ*) yang dipersetujui oleh semua negara ASEAN pada tahun 2001.

Komitmen ini telah menjelaskan pendirian Malaysia yang konsisten untuk menolak apa jua bentuk tindakan berbentuk provokasi yang bakal menyumbang kepada persaingan senjata termasuk senjata nuklear di rantau ini. Malaysia juga telah menandatangani Traktat Mengenai Pengharaman Senjata Nuklear 2017 (*Treaty on The Prohibition of Nuclear Weapons – TPNW*) di bawah Pertubuhan Bangsa-Bangsa Bersatu (PBB) pada 7 Julai 2017 dan meratifikasikannya pada 30 September 2020. Perjanjian ini bertujuan untuk menggerakkan inisiatif perlucutan senjata nuklear di peringkat antarabangsa yang mana menunjukkan komitmen dan sokongan kuat Malaysia untuk penghapusan senjata nuklear secara menyeluruh.

Bagi pertanyaan Yang Berhormat berkenaan prinsip ZOPFAN, iaitu Zon Aman, Bebas dan Berkecuali (*Zone of Peace, Freedom and Neutrality*), suka saya jelaskan bahawa Malaysia sebagai salah satu negara peneraju ASEAN berpegang teguh kepada prinsip ini dan menyeru agar semua negara anggota ASEAN untuk terus bersatu di bawah ASEAN *centrality*.

Malaysia sentiasa memandang ke hadapan bagi memastikan keselamatan dan kedaulatan negara tidak diganggu gugat. Hubungan pertahanan sedia ada dengan negara-negara ASEAN secara dua hala dan pelbagai hala akan terus diperkukuhkan. Melalui satu suara 10 negara anggota ASEAN adalah sukar bagi kuasa-kuasa besar untuk menjejaskan kestabilan Malaysia dan rantau ini secara keseluruhan. Sebagai makluman, Yang Berhormat Menteri Kanan Pertahanan telah menyuarakan pendirian Malaysia berhubung AUKUS ini dalam Mesyuarat Pemukiman Menteri-Menteri Pertahanan ASEAN (ADMM Retreat) pada 10 November 2021 yang lalu.

Malaysia berpegang kepada prinsip negara berkecuali yang sentiasa mengutamakan hubungan yang baik dengan semua negara. Kerajaan akan terus menjalinkan kerjasama pertahanan dua hala dan pelbagai hala dengan negara-negara di Asia Tenggara dan negara-negara kuasa besar seperti Amerika Syarikat dan Republik Rakyat China. Namun, ingin ditegaskan disini bahawa hubungan baik dengan mana-mana negara tidak akan menjejaskan atau mencemar kedaulatan negara.

Terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
(SERIAN)**

TARIKH : 13 DISEMBER 2021(RABU)

SOALAN

Minta **MENTERI KANAN PERTAHANAN** menyatakan bilangan Pos Kawalan yang sedia ada di negeri Sarawak dan berapa yang bakal dibina dalam RMK-12.

JAWAPAN

Tuan Yang di-Pertua,

Terima kasih ke atas pertanyaan Yang Berhormat yang pertanyakan tentang bilangan Pos Kawalan sedia ada di negeri Sarawak dan berapa yang bakal dibina dalam RMK-12.

Sebagai makluman Yang Berhormat, bilangan pos kawalan yang sedia ada di sepanjang sempadan Sarawak - Kalimantan adalah sebanyak 10 pos kawalan. Bagi tahun 2021, terdapat 4 buah pos kawalan baharu yang sedang dibina oleh Tentera Darat iaitu:

- i. Pos Kawalan - Padang Pan di Bau;
- ii. Pos Kawalan - Sungai Paoh di Serian;
- iii. Pos Kawalan - Batu Kaya di Lubok Antu; dan
- iv. Pos Kawalan - Tapak Megah di Kapit.

Bagi tahun 2022 hingga 2023, Tentera Darat akan membina 10 lagi pos kawalan baharu di sepanjang sempadan Sarawak-Kalimantan. Ini menjadikan jumlah pos kawalan keselamatan di sempadan Sarawak-Kalimantan sebanyak 24 pos. Pembinaan ini adalah menggunakan peruntukan semasa Kementerian dan tidak melibatkan peruntukan di bawah RMKe-12.

Terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : HAJI MOHAMAD BIN SABU [KOTA RAJA]

TARIKH : 13 DISEMBER 2021 (ISNIN)

SOALAN

TUAN HAJI MOHAMAD BIN SABU [KOTA RAJA] minta **MENTERI LUAR NEGERI** menyatakan sejauh manakah peranan Malaysia untuk mengekalkan polisi Malaysia sebagai Negara Berkecuali dengan pertembungan kuasa-kuasa besar seperti China dan AUKUS.

JAWAPAN

Tuan Yang di-Pertua,

Saya mengucapkan terima kasih atas pertanyaan yang dikemukakan oleh **Yang Berhormat Kota Raja** berhubung sejauh manakah peranan Malaysia untuk mengekalkan polisi Malaysia sebagai Negara Berkecuali dengan pertembungan kuasa-kuasa besar seperti China dan AUKUS.

Tuan Yang di-Pertua,

2. Kerajaan telah menyatakan bahawa Malaysia gusar dengan tercetusnya pakatan baru AUKUS kerana ia dibimbangi akan mengundang ketegangan di kalangan negara-negara pakatan AUKUS (Amerika Syarikat, United Kingdom dan Australia) dengan negara-negara lain di rantau ini terutamanya China. Kesemua negara-negara ini mempunyai hubungan dua-hala yang sangat substantif dengan Malaysia terutama dalam bidang ekonomi dan kerjasama keselamatan di rantau Asia Tenggara.

3. Seperti mana Dewan sedia maklum, dasar luar Malaysia digubal dengan mengambil kira faktor-faktor unik negara iaitu kedudukan strategik di rantau Asia Tenggara; ciri-ciri Malaysia sebagai sebuah negara yang ditubuh melalui gabungan negeri-negeri di Semenanjung serta Sabah dan Sarawak. Hasilnya, dasar luar Malaysia dikukuhkan dengan prinsip menghormati kebebasan, kedaulatan, keutuhan wilayah dan sikap tidak mencampuri urusan negara lain, penyelesaian masalah secara aman, kewujudan bersama secara harmoni dan hubungan yang saling bermanfaat.
4. Dengan ini, Malaysia akan sentiasa melaksanakan dasar luar yang berprinsip dan pragmatik dengan mengekalkan hubungan dua hala yang baik dengan semua. Malaysia juga mengamalkan sikap berkecuali dan tidak berpihak kepada mana-mana negara berkuasa besar dunia dalam persaingan di antara mereka. Sehingga kini, Malaysia tidak pernah berganjak dari pendirian ini dan sentiasa memastikan setiap tindak tanduk negara selaras dengan prinsip asas Pergerakan Negara-Negara Berkecuali (*Non-Aligned Movement* - NAM).
5. Dasar Luar Malaysia ini seterusnya telah membantu Malaysia dan negara-negara ASEAN melalui tempoh persengketaan antara kuasa-kuasa besar yang amat ketara pada zaman yang lalu. Pendekatan ini diyakini akan terus relevan sebagai kerangka keselamatan di peringkat global dan juga di rantau Asia Tenggara.
6. Malaysia akan terus mempromosikan dasar luar yang berpandangan jauh ke hadapan yang memudahkan perdagangan, pelaburan asing serta mencerminkan Malaysia sebagai sebuah negara yang stabil dan aman. Malaysia juga sentiasa mengambil inisiatif untuk mengimbangkan hubungannya dengan kuasa-kuasa besar melalui dialog bagi membincang serta menyelesaikan isu-isu berkepentingan bersama. Malaysia akan memastikan bahawa hubungan komunikasi dengan kuasa-kuasa besar ini akan sentiasa terbuka dan berterusan. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : JAWAB LISAN

**DARIPADA : TUAN SYED SADDIQ BIN SYED ABDUL RAHMAN
[MUAR]**

TARIKH : 13 DISEMBER 2021 (ISNIN)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI ALAM SEKITAR DAN AIR** menyatakan membentangkan rancangan Malaysia menjadi negara neutral karbon menjelang tahun 2050 sepertimana yang telah diumumkan melalui Rancangan Malaysia Ke-12 (RMK-12) misalnya dengan dasar '*carbon pricing*' dan cukai karbon.

JAWAPAN

Tuan Yang Di-Pertua,

1. Untuk makluman Ahli Yang Berhormat, semasa membentangkan Rancangan Malaysia Ke-12 di Parlimen, YAB Perdana Menteri telah mengumumkan aspirasi negara untuk mencapai sasaran pelepasan gas rumah kaca (GHG) bersih sifar (net-zero GHG emissions) seawal-awalnya pada tahun 2050. YAB Perdana Menteri juga telah menyatakan bahawa pencapaian aspirasi ini adalah tertakluk kepada penyediaan Strategi Jangka Masa Panjang Pembangunan Rendah Karbon (*Long-term Low Emissions Development Strategies – LT-LEDS*) yang akan dimuktamadkan pada tahun 2022.
2. Selain pelaksanaan tindakan mitigasi pengurangan pelepasan GHG oleh sektor-sektor ekonomi, YAB Perdana Menteri juga turut mengumumkan bahawa pencapaian aspirasi pelepasan GHG bersih sifar negara akan disokong oleh pelaksanaan mekanisme penetapan harga karbon atau '*carbon pricing mechanism*'.
3. Mekanisme '*carbon pricing*' merupakan kaedah ekonomi yang memanfaatkan pasaran untuk menjana insentif kewangan bagi menyokong usaha pengurangan pelepasan gas rumah kaca (GHG) di peringkat swasta atau di peringkat nasional. Antara inisiatif yang sering digunakan oleh sesebuah negara di bawah mekanisme '*carbon pricing*' adalah pelaksanaan cukai karbon dan pelaksanaan skim perdagangan karbon di peringkat domestik (*domestic emissions trading scheme*).
4. Untuk makluman Ahli Yang Berhormat juga, Jemaah Menteri pada 17 September 2021 telah bersetuju dengan pembangunan dasar carbon pricing negara yang merangkumi panduan pasaran karbon sukarela antarabangsa (*Voluntary Carbon Market – VCM*) dan pembangunan skim perdagangan karbon peringkat domestik (*domestic emissions trading scheme – DETS*). Pembangunan panduan VCM oleh Kementerian Alam Sekitar dan Air adalah sebagai panduan umum kepada mana-mana entiti di dalam negara yang ingin terlibat dengan pasaran VCM antarabangsa. Panduan VCM dibangunkan oleh KASA bertujuan untuk memastikan kepentingan negara dalam pelaporan perubahan iklim dan komitmen pengurangan pelepasan

GHG negara tidak terjejas. Melalui Panduan VCM ini, mana-mana pihak termasuk pihak swasta yang terlibat hendaklah melaporkan maklumat berkaitan projek karbon yang dilaksanakan kepada KASA.

5. Untuk makluman ahli Yang Berhormat juga, Mesyuarat Majlis Tindakan Perubahan Iklim (MyCAC Bil 2/2021) pada 11 Oktober 2021 telah bersetuju dengan pembangunan Pasaran Karbon Sukarela (Voluntary Carbon Market-VCM) Domestik sebagai peralihan kepada skim Perdagangan Karbon Peringkat Domestik atau *Domestic Emission Trading Scheme* (DETS) yang akan dilaksanakan oleh KASA dengan kerjasama Kementerian Kewangan dan Bursa Malaysia. Pelaksanaan skim ini akan melibatkan pembangunan platform tunggal bagi transaksi kredit karbon di peringkat domestik. Pihak swasta boleh memanfaatkan DETS bagi melaksanakan urusan niaga kredit karbon di peringkat domestik bagi menggalakkan peralihan industri kepada aktiviti rendah karbon dan menarik pelaburan hijau. Kerajaan menjangkakan dengan pelaksanaan mekanisme *carbon pricing* seperti DETS oleh Malaysia akan meningkatkan keupayaan pemain industri dalam menghasilkan produk dan perkhidmatan yang mampu berdaya saing di peringkat antarabangsa.

6. Pembangunan VCM Domestik/DETS adalah merangkumi satu platform tunggal bagi urusan niaga kredit karbon di peringkat domestik secara berfasa. Fasa pertama DETS yang dijangka bermula pada tahun 2022 adalah melibatkan pelaksanaan VCM di peringkat domestik. Antara perkara yang terlibat di bawah fasa pertama DETS adalah mendapatkan dengan izin *buy-in* daripada kerajaan negeri dan potensi pembeli kredit karbon, rekaan pasaran, kerjasama dengan piawaian antarabangsa serta registri.

7. Fasa kedua DETS pula dijangka bermula seawal-awalnya pada tahun 2024 dan akan melibatkan pelaksanaan pasaran karbon pematuhan (*compliance*) di peringkat domestik. Bagi pelaksanaan fasa kedua DETS, Kementerian Alam Sekitar dan Air dengan kerjasama Kementerian Kewangan dan Bursa Malaysia akan membangunkan mekanisme pelaksanaan DETS yang akan menyokong usaha ke arah pencapaian sasaran NDC negara kepada Perjanjian Paris sekaligus menyokong agenda perubahan iklim negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN WONG TACK (BENTONG)

TARIKH : 13 DISEMBER 2021 (ISNIN)

SOALAN

TUAN WONG TACK [BENTONG] minta **MENTERI KANAN KERJA RAYA** menyatakan bilakah kerja-kerja pembinaan Pakej 6 *Central Spine Road* (CSR) iaitu Bentong ke Simpang Pelangai dijangka bermula dan siap.

JAWAPAN

Tuan Yang Di-Pertua,

Untuk makluman Ahli Yang Berhormat, Projek Jalan Central Spine atau Central Spine Road (CSR) merupakan pembinaan jajaran jalan sepanjang dua ratus sembilan puluh lapan perpuluhan enam kilometer (298.6km) melibatkan kos keseluruhan sebanyak Ringgit Malaysia Tujuh Perpuluhan Tujuh Bilion (RM7.7 bilion) yang menghubungkan Kuala Krai, Kelantan ke Persimpangan Lebuh raya Pantai Timur, Karak, Pahang.

Pelaksanaan Jalan Central Spine dimulakan secara berperingkat dalam Rancangan Malaysia Kesembilan (RMKe-9) berdasarkan keutamaan kepada aspek keselamatan, kesesakan lalu lintas dan kesinambungan jajaran. Selaras dengan keperluan trafik semasa, keseluruhan projek ini telah diluluskan dan dibahagikan kepada enam (6) pakej utama.

Sehingga kini, sepanjang lapan puluh sembilan perpuluhan dua lima kilometer (89.25km) bersamaan dua puluh sembilan perpuluhan lapan sembilan peratus (29.89%) daripada keseluruhan jajaran CSR telah siap pembinaan dan telah dibuka kepada pengguna. Selain itu, terdapat dua belas (12) seksyen sepanjang seratus tiga puluh empat perpuluhan tiga kilometer (134.3km) bersamaan empat puluh empat perpuluhan sembilan lapan peratus (44.98%) dalam peringkat pembinaan manakala baki enam (6) seksyen melibatkan tujuh puluh lima perpuluhan kosong lima kilometer (75.05km) bersamaan dua puluh lima perpuluhan satu tiga peratus (25.13%) di peringkat perancangan dan perolehan.

Merujuk kepada pertanyaan Ahli Yang Berhormat, Kementerian Kerja Raya telah memohon pembinaan Projek Jalan Central Spine (CSR) Pakej Enam: Bentong ke Simpang Pelangai dalam Sesi Pemeriksaan Permohonan Projek Rolling Plan Satu (RP1), Rancangan Malaysia Kedua Belas (RMKe-12) yang diadakan bersama Unit Perancang Ekonomi, Jabatan Perdana Menteri pada 28 Mei 2020 yang lalu. Walau

bagaimanapun, kelulusan yang diberikan adalah melibatkan jajaran Sertik ke Persimpangan Lebuhraya Pantai Timur (CH0 – CH8050) sepanjang lapan perpuluhan kosong lima kilometer (8.05 km) berbanding panjang asal empat puluh tujuh perpuluhan lima kilometer (47.5km).

Pembinaan Jalan Central Spine Pakej Enam: Sertik ke Persimpangan Lebuhraya Pantai Timur dijadual akan bermula pada suku pertama tahun 2022 dan dijangka dapat disiapkan pada suku pertama tahun 2025 melibatkan tempoh pembinaan selama tiga puluh enam (36) bulan.

Kementerian Kerja Raya komited untuk melaksanakan projek Jalan Central Spine yang telah diluluskan dalam Rancangan Malaysia Kedua Belas (RMKe-12) dengan kadar segera dan akan memberi tumpuan serta komitmen yang sepenuhnya bagi memastikan projek ini dapat disiapkan mengikut perancangan yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 13 DISEMBER 2021 (ISNIN)

SOALAN:

Minta **PERDANA MENTERI** menyatakan mengapa warga pesara Kerajaan dari Badan-badan Berkanun yang berstatus “AB” tidak lagi layak menerima pengecualian kos rawatan perubatan seperti pesara-pesara Kerajaan yang lain.

JAWAPAN:

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan yang Dipertua,

1. Penubuhan Badan Berkanun adalah berdasarkan kepada akta badan berkanun masing-masing. Maka, sebarang kos rawatan perubatan bagi pesara-pesara Badan Berkanun adalah tertakluk kepada peraturan dan tanggungan Badan Berkanun berkaitan.

2. Kemudahan perubatan bagi penjawat awam dan pesara Persekutuan adalah berdasarkan kepada Perintah Am Bab F (Perubatan) 1974 iaitu mengenai perubatan dan pekeliling-pekeliling perkhidmatan yang berkuatkuasa, manakala kos rawatan perubatan bagi pesara Pihak Berkuasa Berkanun (AB) adalah tertakluk kepada penerimaan pemakaian pekeliling yang berkuatkuasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEEMPAT,
PARLIMEN KEEMPAT BELAS (2021)**

PERTANYAAN : LISAN

**DARIPADA : TUAN FONG KUI LUN
[BUKIT BINTANG]**

TARIKH : 13 DISEMBER 2021 (ISNIN)

SOALAN

TUAN FONG KUI LUN [BUKIT BINTANG] minta **MENTERI WILAYAH PERSEKUTUAN** menyatakan sejauh mana dunia bisnes dan perdagangan dalam Wilayah Persekutuan Kuala Lumpur terjejas akibat pandemik COVID-19 dan usaha untuk pemulihan sepenuhnya dan apakah bantuan Kerajaan kepada pengusaha yang terkesan.

JAWAPAN

Tuan Yang di-Pertua,

Untuk makluman Ahli Yang Berhormat Bukit Bintang, perniagaan dan perdagangan di Wilayah Persekutuan Kuala Lumpur masih kukuh meskipun negara kita teruk dilanda wabak COVID-19 sejak bulan Mac 2021 lalu.

Menyedari hakikat ini, Kementerian Wilayah Persekutuan melalui agensinya iaitu Dewan Bandaraya Kuala Lumpur (DBKL) telah memudahkan urusan warga peniaga dan penjaja di Kuala Lumpur untuk mereka melaksanakan aktiviti kelangsungan hidup melalui inisiatif-inisiatif seperti :

1. Pengecualian Bayaran Fi Lesen Perniagaan di Kuala Lumpur dari Jun – Disember 2021; dan

SOALAN NO : 18

2. Pengecualian Bayaran Sewa Tapak Penjaja di Kuala Lumpur dari Jun – Disember 2021.

Bagi Premis perniagaan pula, antara inisiatif yang telah kita laksanakan adalah seperti berikut :

1. Pengecualian fi pembaharuan lesen perniagaan bagi aktiviti yang terjejas iaitu aktiviti sukan dan rekreasi selama enam (6) bulan bagi tahun 2021-2022;
2. Kemudahan bayaran fi lesen secara suku tahun (3 bulan), separuh tahun (6 bulan) dan bayaran penuh (setahun) bergantung kepada permohonan dan tempoh lesen mengikut fi lesen yang dibayar; dan
3. Bayaran cagaran lesen perniagaan secara ansuran mengikut jadual.

Di samping itu juga, Inisiatif Wilayah Bebas Berniaga diberikan kepada pemegang Lesen Penjaja KL Prihatin iaitu mereka yang terkesan pedapatan akibat Covid-19. Lesen tersebut adalah percuma dari 15 November 2020 hingga 31 Disember 2021.

Bagi waktu operasi pula, kita berpandukan kepada dasar-dasar berkaitan pelaksanaan waktu operasi aktiviti perniagaan di Wilayah Persekutuan Kuala Lumpur sepertimana yang telah ditetapkan dalam Prosidur Operasi Standard (SOP) Majlis Keselamatan Negara.

Untuk makluman Tuan Yang di-Pertua, Inisiatif Wilayah Bebas Berniaga akan dilanjutkan pada tahun 2022 secara minima 6 bulan tertakluk kepada garis panduan DBKL. Ini akan memastikan kemudahan ini disediakan bagi warga Wilayah Persekutuan untuk mendapat rezeki sepanjang negara pulih ekonomi dari impak Covid-19.

**PEMBERITAHUAN PERTANYAAN DEWAN RAKYAT MESYUARAT
KEDUA, PENGGAL KEEMPAT
PARLIMEN KE EMPAT BELAS**

PERTANYAAN : JAWAB LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 13 DISEMBER 2021 [ISNIN]

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI
ALAM SEKITAR DAN AIR** menyatakan status terkini berkenaan benteng pemecah ombak di muara Sungai Merang.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kementerian Alam Sekitar dan Air (KASA) sedia maklum berkenaan isu pemendapan di Muara Sg. Merang. Pada masa ini kerja pengorekan minimum alur pelayaran di kawasan tersebut dilaksanakan oleh JPS untuk kerja-kerja penambakan di Kampung Telipot. Kerja-kerja jangka pendek sebegini akan berterusan mengikut keperluan.
2. Di bawah *Rolling Plan* ke-4 (RP4) RMKe-11, Kerajaan telah meluluskan Kajian Pemuliharaan Muara Sungai Merang, Daerah Setiu, Terengganu untuk dilaksanakan JPS dengan kos projek sebanyak RM2 juta. Kajian ini dalam perlaksanaan di peringkat Draf Laporan Akhir dan dijangka siap pada Januari 2022.
3. Bagi perancangan rekabentuk seterusnya, permohonan peruntukan akan dibuat dalam *Rolling Plan* Ke-3 (RP3) RMK-12. Kerja-kerja fizikal dijangka bermula pada penghujung 2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan secara terperinci dasar fiskal yang sedang dan akan direncanakan bagi mengurangkan jurang kemiskinan di kawasan- kawasan pedalaman dan luar bandar di negeri Sabah secara amnya dan kawasan Parlimen Kota Belud secara khususnya.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Dalam RMKe-12, bantuan Kerajaan bagi jangka sederhana dan panjang akan meneruskan dasar dan strategi untuk meningkatkan pendapatan dan kuasa beli terutamanya isi rumah miskin dalam kalangan B40 dengan:

- Menyediakan program peningkatan pendapatan serta peningkatan keupayaan;
- Menambah baik akses kepada keperluan asas termasuk pendidikan, kesihatan dan perumahan;

- Menggalakkan keusahawanan dan akses kepada pembiayaan kewangan; dan
- Meningkatkan perlindungan sosial.

2. Kerajaan juga akan memperkukuh pembangunan sosioekonomi di Sabah, termasuk menangani kemiskinan dan mempelbagaikan sumber pendapatan serta memperkukuh pembangunan sosioekonomi bagi Anak Negeri Sabah. Melalui Program Khas Anak Negeri Sabah, program/projek yang dirancang akan memberi fokus kepada pembangunan masyarakat Bumiputera di Sabah terutamanya berkaitan hak tanah adat, Mahkamah Adat dan pembangunan modal insan.

3. Di samping itu, Bahagian Hal Ehwal Sabah dan Sarawak, Jabatan Perdana Menteri akan memainkan peranan bagi memperkukuh kerjasama antara Agensi Persekutuan dan Kerajaan Negeri untuk memastikan penyampaian perkhidmatan kepada kumpulan sasar. Untuk ini, Kerajaan telah memperuntukkan RM42.9 juta untuk tahun 2021.

4. Kerajaan akan melaksanakan model pembasmian kemiskinan tegar secara holistik dengan menggunakan pendekatan keseluruhan negara. Lokaliti di daerah-daerah termiskin akan dipilih bersama-sama Kerajaan Negeri supaya pendekatan holistik melibatkan Kerajaan, sektor swasta, syarikat berkaitan kerajaan dan pertubuhan masyarakat sivil dapat dilaksanakan.

5. Untuk makluman Yang Berhormat jua, antara projek utama di Parlimen Kota Belud di bawah *Rolling Plan* Pertama tahun 2021 Rancangan Malaysia Kedua Belas dengan siling pembangunan berjumlah RM136.7 juta termasuk projek seperti berikut:

i. Kementerian Alam Sekitar dan Air

Rancangan Tebatan Banjir Sg. Kedamaian/Sg. Tempasuk/Sg. Abai & Sg Kawang-Kawang.

ii. Kementerian Kerja Raya

Pembaikan cerun-cerun Jalan Kota Belud-Kudat.

iii. Kementerian Pembangunan Luar Bandar

Projek bekalan air luar bandar, menaiktaraf Jambatan Sg. Tambilung, menaik taraf Jalan Dudar, Jalan Tengkurus Lahanas Siba, Jalan Sayap dan Jalan Podos Taginambur.

iv. Kementerian Pendidikan

Pelbagai projek pembinaan dan naik taraf bangunan sekolah, prasekolah, bilik darjah, asrama, pejabat guru dan bekalan air telaga di sekolah sekitar Kota Belud.

v. Kementerian Pertahanan

Projek Pembinaan Kem Brigade dan Rejimen Askar Melayu Diraja (RAMD).

vi. Kementerian Pertanian dan Industri Makanan

Pelbagai projek pembinaan dan naik taraf sekitar Jawi-Jawi dan Tempasuk, pembangunan dan pengurusan teknologi tanaman padi secara lestari, pembangunan dan pengurusan pemulihan tanah sawah bermasalah, pembangunan kemudahan latihan teknologi pertanian moden di Institut Pertanian Sabah Timbang Menggaris.

vii. Kementerian Perumahan dan Kerajaan Tempatan

Bazar Rakyat dan projek naik taraf balai bomba dan penyelamat

viii. Kementerian Tenaga dan Sumber Asli

Projek Pembahagian – SSU Pirasan

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan sejauh manakah pelaksanaan dasar Rangka Tindakan (*Blueprint*) Ekonomi Digital khususnya dalam menangani jurang digital di kawasan bandar dan luar bandar sejak ia dilancarkan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Rangka Tindakan (*Blueprint*) Ekonomi Digital Malaysia (RTEDM) yang telah dilancarkan pada 19 Februari 2021 telah memperkenalkan beberapa strategi dan inisiatif khusus untuk menangani jurang digital. Ini termasuk:

- (i) Meningkatkan penyertaan rakyat Malaysia yang inklusif dalam aktiviti digital;
- (ii) Memperkasa kumpulan sasar khusus dalam masyarakat untuk turut serta dalam ekonomi digital melalui aktiviti keusahawanan;

- (iii) Meningkatkan keupayaan infrastruktur teknologi digital;
- (iv) Menjadikan jalur lebar sebagai infrastruktur asas mandatori untuk memastikan ketersediaan akses;
- (v) Menyediakan platform untuk mengenal pasti keperluan jalur lebar masa nyata untuk perancangan dan pemantauan yang berkesan bagi pembangunan baharu;
- (vi) Memperkenalkan program “*My Device*” untuk memastikan semua pelajar di Malaysia mendapat akses kepada pembelajaran digital; dan
- (vii) Mempromosikan program *onboarding* pembayaran elektronik bagi peniaga dan pengguna untuk menjadi masyarakat tanpa tunai.

2. Sehingga kini, telah terdapat beberapa kejayaan daripada pelaksanaan strategi dan inisiatif RTEDM. Antara kejayaan tersebut adalah seperti berikut:

- (i) liputan rangkaian mudah alih 4G telah diperluas daripada 91.8% kepada 94.03% di kawasan berpenduduk;
- (ii) kelajuan jalur lebar dipertingkat daripada 25 Mbps kepada 31.34 Mbps;
- (iii) Sebanyak 873 Pusat Internet Komuniti dan 37 Pusat Internet Desa akan ditransformasi kepada Pusat Ekonomi Digital Keluarga Malaysia (PEDi) yang akan menyediakan aktiviti e-dagang, latihan kemahiran dan pembelajaran kepada masyarakat setempat; dan
- (iv) Seramai 1,478 usahawan telah menjalankan perniagaan dalam talian menggunakan platform e-dagang menerusi Program Pemerkasaan Pendigitalan Usahawan Kecil (PUPUK).

3. Pelaksanaan RTEDM akan terus dipantau oleh Majlis Ekonomi Digital dan 4IR Negara yang dipengerusikan sendiri oleh Yang Amat Berhormat Perdana Menteri. Banyak lagi pencapaian yang dijangka akan terus diperoleh hasil daripada pelaksanaan RTEDM. Di samping itu, pelbagai strategi dan inisiatif untuk menangani jurang digital telah digariskan dalam Rancangan Malaysia Kedua Belas, Bab 6: Mempertingkat Keseimbangan dan Keterangkuman Wilayah, Bab 7: Memperkukuh Pembangunan Sosioekonomi di Sabah dan Sarawak, Bab 11: Melonjakkan Pendigitalan dan Teknologi Termaju serta Pemacu Perubahan XI: Meningkatkan Ketersambungan Digital untuk Pembangunan Inklusif.

4. Kesemua usaha dan inisiatif yang dirancang ini akan membolehkan rakyat mendapat peluang yang saksama bagi menyertai dan mendapat faedah daripada ekonomi digital.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 13 DISEMBER 2021 (ISNIN)

SOALAN:

Minta **PERDANA MENTERI** menyatakan adakah Peruntukan Khas Perdana Menteri untuk kawasan Parlimen diberikan kepada semua Ahli Parlimen termasuk mereka yang tidak menandatangani Memorandum Persefahaman (MOU) dengan Kerajaan, jumlahnya dan bilakah ianya diberikan.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Peruntukan Khas YAB Perdana Menteri untuk kawasan Parlimen hanyalah sebagai penambah dan pelengkap kepada peruntukan di bawah Rancangan Malaysia Lima Tahun. Penyediaan dan penyaluran peruntukan ini adalah mengikut dasar sedia ada dan tertakluk kepada kemampuan semasa kewangan Kerajaan.

2. Justeru, peruntukan kepada Ahli Parlimen adalah selaras dengan Transformasi Parlimen yang termaktub dalam Memorandum Persefahaman (MoU) Transformasi dan Kestabilan Politik yang telah dimeterai oleh pihak Kerajaan dan Pakatan Harapan pada 13 September 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 13 DISEMBER 2021 [ISNIN]

SOALAN:

Minta **PERDANA MENTERI** menyatakan tindakan penguatkuasaan undang-undang, dakwah dan pendidikan bagi membendung aktiviti jenayah seksual dan LGBT yang berleluasa dalam masyarakat.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Yang Berhormat, kerajaan memandang serius mengenai aktiviti gejala jenayah seksual termasuk LGBT yang dilihat berleluasa dalam masyarakat hari ini.
2. Kerajaan dari masa ke semasa sentiasa berusaha melaksanakan yang terbaik untuk membantu menangani isu-isu sosial yang berlaku. Antara usaha yang telah dilaksanakan adalah seperti berikut:

i) Enakmen Undang-Undang Jenayah Syariah

Kerajaan telah memperuntukkan perundangan dan hukuman bagi kesalahan jenayah sosial seperti perzinaan, sumbang mahram, khalwat, musahaqah, orang lelaki berlagak seperti perempuan yang terkandung dalam Akta Kesalahan Jenayah Syariah Negeri-Negeri.

ii) Pelaksanaan Program Pendidikan dan Advokasi

Kerajaan melalui JAKIM dengan kerjasama Jabatan Agama Islam Negeri serta agensi juga menganjurkan program pendidikan dan advokasi kepada masyarakat dari masa ke semasa seperti Webinar Isu Sosial Dalam Kalangan Remaja, Webinar Cakna Pergaulan Anda 3.0: “Isteri di Rumah Kekasih di Pejabat” anjuran JAKIM adalah antara usaha untuk memberi kefahaman berkaitan Undang-Undang Jenayah Syariah.

iii) Pembangunan Pelan Tindakan Sosial Islam (PTSI)

Kerajaan melalui Jabatan Kemajuan Islam Malaysia (JAKIM) dengan kerjasama daripada semua agensi dan Jabatan Agama Islam Negeri-negeri telah membangunkan Pelan Tindakan Sosial Islam (PTSI) yang telah dipersetujui oleh Mesyuarat Majlis Kebangsaan Bagi Hal Ehwal Ugama Islam Malaysia (MKI) Kali Ke-66 pada 13 Jun 2019 yang dipengerusikan oleh YAB Perdana Menteri.

PTSI merupakan inisiatif Kerajaan bagi menangani gejala sosial dalam kalangan masyarakat terutamanya permasalahan sosial yang dihadapi masyarakat Islam di Malaysia yang semakin meruncing, dengan pelbagai isu seperti penagihan dadah, remaja hamil (tidak berkahwin), pembuangan bayi, perceraian, gelandangan, penularan virus HIV / AIDS, penagihan arak, seks bebas, sumbang mahram, jenayah juvana, pengamalan gaya hidup songsang dan sebagainya. Pelaksanaan PTSI dilihat dapat membantu usaha pencegahan dan pemulihan secara lebih sepadu, terancang dan tersusun.

iv) Penubuhan Pusat Khidmat Sosial

Kerajaan juga telah mewujudkan Pusat Khidmat Keluarga dan Sosial Komuniti (PKKSK) termasuk *KSKCareCentre* yang diletakkan di bawah JAKIM. *KSKCareCentre* merupakan pusat khidmat kaunseling syarie, terapi psikospiritual Islam dan Ilaj Syarie yang terletak di Masjid Tuanku Mizan Zainal Abidin yang dibuka kepada semua masyarakat awam dan memberikan perkhidmatan secara percuma.

v) Pembinaan Pusat Perlindungan

Pewujudan pusat-pusat perlindungan yang dibangunkan oleh Majlis Agama Islam Negeri seperti Darul Islah atau Dar Assaadah yang ditubuhkan oleh Majlis Agama Islam Wilayah Persekutuan (MAIWP) bertujuan memberi perlindungan kepada wanita-wanita yang telah terjebak dengan masalah gejala sosial. Semasa berada di rumah perlindungan ini wanita-wanita atau anak-anak remaja ini diberi bimbingan kerohanian dan kemahiran supaya mereka kembali ke pangkal jalan dan mampu berdikari bila keluar dan berhadapan dengan masyarakat kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 13 DISEMBER 2021 (ISNIN)

SOALAN

TUAN PANG HOK LIONG [LABIS] minta **KEMENTERIAN PERDAGANGAN ANTARABANGSA DAN INDUSTRI** menyatakan jumlah pelaburan dari negeri China ke negara ini setiap tahun dari tahun 2015 hingga 2020 memandangkan pihak Kementerian telah membuka 3 pejabat MIDA di negeri China.

JAWAPAN

Tuan Yang di-Pertua,

Sebaik sahaja negara China menyertai Organisasi Perdagangan Dunia (WTO) pada tahun 2001, Lembaga Pembangunan Pelaburan Malaysia (MIDA) menubuhkan pejabat luar negara yang pertama di China, iaitu di Shanghai. Kemudian, MIDA telah menubuhkan pejabat luar negara di China yang kedua iaitu di Guangzhou berasaskan dasar 'Go Out Policy' yang diperkenalkan oleh Kerajaan China pada tahun 2006 yang bertujuan untuk menggalakkan syarikat-syarikat China untuk melabur ke luar negara.

Berasaskan dasar 'Go Global Policy' yang dilihat sebagai salah satu strategi ekonomi jangka panjang bagi negara China, MIDA telah membuka pejabat luar negara di China yang ketiga iaitu di Beijing pada tahun 2015 bagi menarik masuk pelaburan langsung asing dari negara tersebut. Usaha ini dilihat telah berjaya menarik pelaburan yang berkualiti dan bernilai tambah tinggi dari negara China.

Bagi tempoh 2015 hingga 2020, projek-projek pelaburan sektor perkilangan yang diluluskan dari negara China adalah sebanyak RM63.22 bilion (US\$15.34 bilion) yang menyediakan sejumlah 56,030 peluang pekerjaan. Pecahan jumlah pelaburan yang diluluskan bagi tahun 2015 hingga 2020 adalah seperti berikut:

No.	Tahun	Bilangan Projek Yang Diluluskan	Jumlah Pelaburan Yang Diluluskan
1.	2015	17	RM1.8 bilion
2.	2016	33	RM4.7 bilion
3.	2017	20	RM3.8 bilion
4.	2018	40	RM19.6 bilion
5.	2019	79	RM15.3 bilion

No.	Tahun	Bilangan Projek Yang Diluluskan	Jumlah Pelaburan Yang Diluluskan
6.	2020	71	RM17.7 bilion

Projek-projek utama yang diluluskan oleh pelaburan negara China di Malaysia adalah melalui industri-industri seperti produk logam asas, kertas, percetakan dan penerbitan, produk mineral bukan logam, produk petroleum serta elektrik dan elektronik.

Negara China merupakan negara yang paling tinggi melabur di dalam sektor perkilangan di Malaysia selama lima (5) tahun berturut-turut iaitu dari tahun 2016 hingga tahun 2020. Daripada jumlah pelaburan yang diluluskan bagi tahun 2015 hingga 2020 ini, sejumlah 162 buah projek bernilai RM15.84 bilion (US\$3.79 bilion) telah dilaksanakan dan menyediakan 28,211 peluang pekerjaan.

Projek dan jumlah pelaburan dari negara China dilihat telah meningkat secara mendadak iaitu sebanyak 883% dari RM1.8 bilion pada tahun 2015 kepada RM17.7 bilion pada tahun 2020. Kerajaan melalui MIDA komited untuk menarik lebih banyak pelaburan dari negara China melalui strategi-strategi khusus bagi yang telah dilaksanakan dan akan diteruskan oleh MIDA termasuklah:

- a. Memanfaat peluang pelaburan daripada dasar semasa Kerajaan China yang telah diperkenalkan pada September 2013 iaitu *Belt & Road Initiative (BRI)* melalui pembinaan taman perindustrian iaitu "*Malaysia-China Kuantan Industrial Park (MCKIP)*", hab logistik serta *Transit Oriented Developments (TOD)*;
- b. Memudahkan aliran masuk pelaburan asing ekoran isu hubungan antara Konflik Perdagangan di antara Amerika Syarikat-China;
- c. Menyasar 10 sektor keutamaan di bawah dasar '*Made in China 2025*' iaitu:
 - i. mesin automatik dan robotik (*robotics*);

- ii. aeroangkasa dan aeronautik (*aviation and aerospace equipment*);
 - iii. *biopharma* dan peralatan perubatan berteknologi tinggi (*biopharma and hi-tech medical devices*);
 - iv. sumber tenaga baharu dan kenderaan jimat tenaga (*new energy & energy saving vehicles*);
 - v. peralatan maritim dan kapal berteknologi tinggi (*maritime equipment & hi-tech ships*);
 - vi. pengangkutan kereta api (*railway transport*);
 - vii. teknologi maklumat generasi baharu (*new generation information technology*);
 - viii. peralatan tenaga (*energy equipment*);
 - ix. bahan baharu (*new materials*); dan
 - x. peralatan pertanian (*agricultural equipment*); dan
- d. Memberi fokus untuk menarik syarikat-syarikat China yang berprofil tinggi dalam senarai 'Fortune China 500' serta 'Unicorns Global' yang terlibat dalam sektor teknologi yang boleh memacu transformasi sektor perkilangan Malaysia melalui inovasi.

Kerajaan juga komited untuk menarik pelaburan asing dari negara-negara yang lain dalam memastikan agar Malaysia terus kekal sebagai lokasi yang mesra pelabur bagi pertumbuhan jangka panjang perniagaan asing dan domestik meskipun wabak pandemik COVID-19 telah mengubah sistem perindustrian global.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SAIFUDDIN NASUTION
BIN ISMAIL [KULIM]**

TARIKH : 13 DISEMBER 2021 | ISNIN

SOALAN

**DATUK SERI SAIFUDDIN NASUTION BIN ISMAIL [KULIM BANDAR
BAHARU]** minta **PERDANA MENTERI** menyatakan adakah Tabung Haji akan mengekalkan subsidi haji kepada bakal-bakal jemaah haji dan berapa anggaran komitmen kewangan yang perlu dibiayai oleh Tabung Haji.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang Di-Pertua,

1. Untuk makluman Ahli Yang Berhormat, sebagai sebuah institusi Islam yang bertanggungjawab dalam semua urusan berkaitan ibadat haji dan memastikan kebajikan jemaah haji terpelihara, Lembaga Tabung Haji (**TH**) akan terus menanggung pemberian bantuan kewangan haji.
2. Kadar bantuan kewangan ini akan ditetapkan setelah mengambil kira secara menyeluruh keupayaan dan kedudukan kewangan **TH**, serta konsep Istito'ah iaitu kemampuan seseorang itu menunaikan haji.
3. Pada tahun 2019 sebelum berlakunya pandemik COVID-19, kos untuk menunaikan haji (Kos Haji) adalah RM22,900 seorang untuk jemaah haji Muassasah yang dikendalikan oleh **TH**. Bagi jemaah Muassasah yang menunaikan haji buat kali pertama, mereka hanya perlu membayar RM9,980 sebagai Bayaran Haji manakala baki sebanyak RM12,920 atau 56% dari Kos Haji ditanggung oleh **TH** sebagai bantuan kewangan haji. Bayaran Haji ini tidak pernah dinaikkan oleh **TH** sejak tahun 2009.
4. Sejumlah RM2.2 bilion telah dibelanjakan oleh **TH** sendiri bagi menampung bantuan kewangan haji tersebut sejak 2001 sehingga 2019. Bantuan kewangan haji ini dibiayai daripada hasil pendapatan pelaburan **TH** setiap tahun. Ini bermakna, semakin bertambah jumlah bantuan kewangan kepada jemaah haji, maka agihan keuntungan kepada kesemua pendeposit **TH** akan berkurangan.
5. **TH** menjangkakan kos untuk menunaikan fardu haji pada tahun 2022 akan terus meningkat. Ianya disebabkan beberapa faktor termasuk kadar inflasi dan peningkatan kadar percukaian *value added tax* (VAT dari 5% kepada 15% di Arab Saudi serta impak dari pelaksanaan prosedur

operasi standard COVID-19 dan protokol kesihatan seperti keperluan ujian PCR, penjarakan fizikal dan lain-lain.

6. Kos Haji musim 1443 Hijrah bagi tahun 2022 akan dianggarkan oleh **TH** setelah mengambil kira peraturan dan caj semasa seperti yang dimaklumkan oleh Kerajaan Arab Saudi berkaitan perkhidmatan-perkhidmatan asas untuk jemaah haji.

7. Orang ramai adalah dinasihati untuk menunggu pengumuman rasmi mengenai Kos Haji dan Bayaran Haji daripada **TH** dan bukan dari pihak-pihak lain yang tidak terlibat dalam urusan haji. **TH** akan terus memastikan aspek kebajikan jemaah haji terjaga di samping mereka turut sama menikmati faedah sebagai para pendeposit yang menyimpan untuk menunaikan haji.

8. Selain itu semua bakal haji dinasihatkan untuk membuat persiapan awal dari aspek ilmu ibadat haji, kesihatan, rohani, jasmani dan kewangan agar bersedia apabila tiba masa dipanggil untuk mengerjakan haji nanti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMKARPAL SINGH A/L KARPAL
SINGH [BUKIT GELUGOR]**

TARIKH : 13 DISEMBER 2021 (ISNIN)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **PERDANA MENTERI** menyatakan sama ada pindaan-pindaan terhadap Kanun Keseksaan yang sedang dalam proses kajian sepertimana yang dinyatakan dalam dokumen Rancangan Malaysia Ke-12 akan melibatkan pindaan bagi menghapuskan (*abolish*) hukuman mati mandatori.

JAWAPAN**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kanun Keseksaan [Akta 574] digubal bagi memperuntukkan kesalahan-kesalahan bagi perbuatan jenayah yang menyalahi undang-undang berserta hukuman bagi setiap kesalahan yang diperuntukkan tersebut.

Pada masa ini, terdapat 9 jenis kesalahan di bawah Akta 574 yang membawa hukuman mati mandatori seperti berikut:

Seksyen	Jenis kesalahan
121A	Kesalahan-kesalahan terhadap tubuh Yang di-Pertuan Agong, Raja atau Yang di-Pertua Negeri.
130C	Melakukan perbuatan pengganas, sekiranya perbuatan tersebut mengakibatkan kematian.
130I	Mengarahkan aktiviti-aktiviti kumpulan pengganas, sekiranya perbuatan tersebut mengakibatkan kematian.
130N	Memberikan atau mengumpul harta untuk perbuatan pengganas, sekiranya perbuatan tersebut mengakibatkan kematian.
130O	Memberikan perkhidmatan bagi tujuan pengganas, sekiranya perbuatan tersebut mengakibatkan kematian.
130QA	Menerima suapan untuk memudahkan atau membolehkan perbuatan keganasan, sekiranya perbuatan tersebut mengakibatkan kematian.
130ZB	Menerima suapan untuk memudahkan atau membolehkan aktiviti jenayah terancang, sekiranya perbuatan tersebut mengakibatkan kematian.
302	Seksaan bagi kesalahan bunuh yang diperuntukkan di bawah seksyen 300.
374A	Mengambil tebusan.

Untuk makluman Ahli Yang Berhormat, berdasarkan kepada Dokumen Rancangan Malaysia Ke-12, di muka surat 180, Perkara 4-18, dinyatakan bahawa:

“Beberapa undang-undang akan dipinda untuk memastikan kesesuaian dan keberkesanan bagi meningkatkan keselamatan dan ketenteraman awam. Ini termasuk undang-undang berkaitan jenayah merangkumi Akta Pencegahan Jenayah 1959, Akta Kesalahan Keselamatan (Langkah Khas) 2012, Akta Pencegahan Keganasan 2015 dan Kanun Keseksaan. Di samping itu, Akta Hasutan 1948 serta Akta Percetakan dan Penerbitan 1984 akan disemak semula.”.

Kajian terhadap sesuatu peruntukan undang-undang hendaklah dilakukan dengan berhati-hati dan menyeluruh. Ia penting dalam memastikan pindaan undang-undang kelak memperuntukkan hukuman yang setimpal dengan kesalahan yang dilakukan. Ia juga penting dalam memastikan Kanun Keseksaan yang berkuat kuasa pada masa kini kekal relevan dan sesuai dengan peredaran masa.

Pada 29 Ogos 2019, Kerajaan telah menubuhkan satu Jawatankuasa Kajian Khas Hukuman Gantian Terhadap Hukuman Mati Mandatori (“Jawatankuasa Khas”). Jawatankuasa Khas ini terdiri daripada pakar-pakar perundangan dan kehakiman bagi tempoh 4 bulan bermula 20 September 2019 hingga 31 Januari 2020 untuk melaksanakan Kajian Hukuman Gantian Terhadap Hukuman Mati Mandatori. Jawatankuasa Khas ini diberi mandat untuk mengkaji cadangan menggantikan hukuman mati mandatori dengan hukuman yang lebih wajar, tertakluk kepada budi bicara Mahkamah.

Secara umumnya, Jawatankuasa Khas ini telah melaksanakan kajian yang bersifat komprehensif dan holistik melalui pelbagai kaedah pengumpulan data dan maklumat daripada pelbagai lapisan masyarakat. Jawatankuasa Khas tersebut telah pun menyediakan laporannya dan Kerajaan sedang meneliti laporan tersebut bagi menentukan tindakan

selanjutnya yang perlu diambil agar ia selaras dengan peruntukan Perlembagaan Persekutuan dan undang-undang yang sedia ada.

Kajian melibatkan hukuman mati mandatori ini secara khususnya tidak terangkum dalam Rancangan Malaysia Ke-12. Sungguhpun demikian, Kerajaan masih berhasrat untuk mempertimbangkan kajian cadangan gantian hukuman mati mandatori tersebut.

Oleh itu, sebarang pertimbangan Kerajaan kelak adalah akan berlandaskan kepada syor-syor kajian dan maklum balas menyeluruh yang diterima daripada semua pihak demi memastikan langkah pembaharuan perundangan negara adalah menjamin kemaslahatan masyarakat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KE EMPAT BELAS**

PERTANYAAN : JAWAB LISAN

DARIPADA : TUAN OSCAR LING CHAI YEW [SIBU]

TARIKH : 13 DISEMBER 2021 [ISNIN]

SOALAN

TUAN OSCAR LING CHAI YEW [SIBU] minta **MENTERI ALAM SEKITAR DAN AIR** menyatakan perkembangan terkini projek tebatan banjir SibU. Nyatakan bila fasa selanjutnya akan bermula dan kosnya.

JAWAPAN

Tuan Yang Di-Pertua,

1. Untuk makluman Ahli Yang Berhormat, projek Rancangan Tebatan Banjir (RTB) SibU Fasa 3, Lembangan Batang Rajang telah diluluskan di bawah Rancangan Malaysia Kesebelas (RMKe-11) dengan kos berjumlah RM91 juta. Projek ini sedang dilaksanakan dengan status kemajuan kerja semasa adalah 48% dan dijangka siap menjelang Ogos 2022.
2. Peruntukan bagi fasa seterusnya telah dimohon sebanyak RM395 juta dalam *Rolling Plan 2* (RP2) RMKe-12.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 13 DISEMBER 2021 (ISNIN)

SOALAN :

TUAN WONG KAH WOH [IPOH TIMUR] minta **PERDANA MENTERI** menyatakan status pencapaian Pelan Antirasuah Nasional (NACP).

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Pelan Antirasuah Nasional (NACP) telah bermula pelaksanaannya pada Januari 2019 yang merangkumi 115 inisiatif yang dibahagikan kepada 6 bidang utama. Sehingga 31 Disember 2019, 29 inisiatif yang telah selesai pelaksanaan dengan pencapaian output pada tahun 2019.

Laporan Semakan Semula Separuh Penggal Pelan Antirasuah Nasional (NACP) 2019-2023 telah dikeluarkan pada 19 Mei 2021 dengan menggariskan 82 inisiatif berasaskan kepada keperluan penambahbaikan berterusan seiring dengan dasar semasa kerajaan ke atas inisiatif-inisiatif yang digariskan dalam NACP 2019-2023.

Laporan Kemajuan NACP Bagi Tahun 2019 telah diedarkan kepada Parlimen pada November 2020 serta Laporan Kemajuan NACP Bagi Tahun 2020 dan 2021 akan dikeluarkan pada Penggal Kelima, Parlimen Ke-14 Tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN TERESA KOK SUH SIM [SEPUTEH]

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan bagaimana Kerajaan mengukur pencapaian (atau KPI) setiap anggota Jemaah Menteri dalam tempoh 100 hari. Adakah Kerajaan telah menubuhkan jawatankuasa yang memantau pelaksanaan program setiap Menteri atau akan memberi peluang kepada rakyat untuk menilai pencapaian.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Sejumlah 108 KPI dan 140 sasaran Aspirasi Keluarga Malaysia (AKM) dalam tempoh 100 hari pertama ahli Jemaah Menteri telah ditetapkan oleh YAB Perdana Menteri yang memberi fokus kepada rakyat dengan menerapkan nilai keterangkuman, kebersamaan dan kesyukuran.
2. Penetapan Aspirasi Keluarga Malaysia ini adalah berlandaskan kepada enam (6) Teras Utama yang telah dikenalpasti iaitu:
 - a) Menstruktur Semula Ekonomi;
 - b) Menjamin Keselamatan dan Ketenteraman Negara;
 - c) Meningkatkan Kesejahteraan Sosial;

- d) Mempertingkatkan Infrastruktur Menyeluruh;
- e) Memperkukuh Penyatuan dalam Acuan Keluarga Malaysia;
dan
- f) Memperkasa Penyampaian Perkhidmatan.

3. Aspirasi yang telah ditetapkan di bawah keenam-enam teras tersebut akan dinilai berdasarkan 3 elemen utama iaitu Penilaian Prestasi Kementerian/Jabatan, Penilaian Kepimpinan berdasarkan keberkesanan keberhasilan inisiatif, serta Penilaian Persepsi Awam terhadap anggota Jemaah Menteri dan Kementerian/Jabatan di bawah tanggungjawab mereka.

4. Dalam hubungan ini, rakyat akan mendapat peluang memberi pendapat dan menilai pencapaian aspirasi melalui borang soal selidik secara dalam talian yang akan dipamerkan di portal-portal kementerian dan agensi atau melalui agensi-agensi berkaitan yang berada di lapangan.

5. Anggota Jemaah Menteri juga dikehendaki untuk membentangkan Kad Laporan Pencapaian Aspirasi Keluarga Malaysia 100 hari ini kepada rakyat bagi mendapatkan penambahbaikan serta idea-idea baharu demi kesejahteraan Keluarga Malaysia. Bagi maksud ini, Kerajaan mengadakan satu program bertemakan 100 Hari Aspirasi Keluarga Malaysia pada 9 hingga 12 Disember 2021 di Kuala Lumpur Convention Centre.

6. Pejabat Ketua Setiausaha Negara, Unit Pemodenan Tadbiran dan Perancangan Pengurusan Malaysia (MAMPU) dan Unit Penyampaian Kemakmuran Bersama (SEPADU) bertindak sebagai penyelaras bersama bagi memastikan perancangan, pelaksanaan, pemantauan dan penambahbaikan setiap aspirasi Keluarga Malaysia oleh anggota Jemaah Menteri dapat dijayakan dengan cemerlang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 13 DISEMBER 2021 (ISNIN)

SOALAN :

PUAN TEO NIE CHING [KULAI] minta **PERDANA MENTERI** menyatakan bilangan Menteri dan Timbalan Menteri yang mempunyai akaun luar pesisir. Sama ada mereka wajib mengisytiharkan harta benda di luar Malaysia kepada SPRM.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, berdasarkan kepada Kod Etika bagi Anggota Pentadbiran dan Ahli Parlimen 2018, Perisytiharan harta, perolehan harta tambahan dan pelupusan harta Anggota Pentadbiran dan Ahli Parlimen serta isteri atau suami, anak dan pemegang amanah mereka hendaklah dikemukakan kepada YAB Perdana Menteri dan disalinkan kepada Ketua Pesuruhjaya Suruhanjaya Pencegahan Rasuah Malaysia (SPRM).

Berikut adalah ahli-ahli Jemaah Menteri dan Timbalan Menteri yang telah mengisytihar aset luar Negara mereka dan disalinkan kepada SPRM:

- i. YB Senator Datuk Seri Utama Tengku Zafrul bin Tengku Abdul Aziz
- ii. YB senator Datuk Dr. Mohd Radzi bin Md Jidin
- iii. YB Datuk Seri Dr. Santhara Kumar a/l Ramanaidu
- iv. YB Senator Datuk Lim Ban Hong.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 13 DISEMBER 2021 (ISNIN)

SOALAN:

Minta **PERDANA MENTERI** menyatakan peruntukan yang telah dan akan disediakan bagi membaik pulih rumah ibadah seperti surau, masjid, gereja, tokong dan kuil di Parlimen Papar mengikut pecahan DUN Pantai Manis, DUN Limbahau dan DUN Kawang sehingga kini.

JAWAPAN:

**DIJAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Bermula dari tahun 2018 sehingga kini, sebanyak RM959,000 peruntukan telah diluluskan di kawasan Parlimen Papar bagi kerja-kerja bina baharu dan naik taraf rumah ibadat.
2. Daripada jumlah tersebut, sebanyak RM871,000 adalah bagi pelaksanaan projek-projek di kawasan DUN Kawang manakala selebihnya iaitu sebanyak RM88,000 adalah di kawasan DUN Pantai Manis.
3. Kelulusan peruntukan bagi pelaksanaan projek bina baharu dan naik taraf rumah ibadat ini adalah berdasarkan keperluan penduduk setempat dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan berapa anggaran kerugian yang dialami oleh Petronas dan apakah langkah-langkah proaktif yang diambil oleh Kerajaan bagi membantu Syarikat Petronas yang dikatakan menghadapi rampasan aset oleh Kerajaan Sementara Sudan baru-baru ini.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. PETRONAS baru-baru ini telah mengumumkan prestasi kewangan dan operasinya bagi suku kedua dan separuh pertama tahun kewangan 2021, dengan pendapatan dan keuntungan bersih Kumpulan Syarikat (*PETRONAS Group*) mencatatkan peningkatan berbanding pada tempoh yang sama pada tahun 2020. Pendapatan atau *revenue* kumpulan PETRONAS pada separuh pertama tahun 2021 mencatatkan peningkatan 17 peratus kepada RM109.6 bilion berbanding RM93.6 bilion pada separuh pertama tahun 2020, sebahagian besarnya berikutan purata harga direalisasikan yang baik untuk produk utama dan impak

jualan yang lebih tinggi, terutamanya dalam jualan gas asli cecair (LNG) dan gas asli.

2. Pada masa yang sama, keuntungan lepas cukai atau *profit after tax* (PAT) turut meningkat lebih 100 peratus kepada RM18.9 bilion berbanding kerugian bersih sebanyak RM16.5 bilion dalam tempoh sama tahun lepas. Sepertimana semua sedia maklum, tahun 2020 merupakan tahun yang amat mencabar bagi sektor minyak dan gas berikutan impak daripada pandemik COVID-19 dan sekatan pergerakan serta perjalanan yang menyebabkan kemerosotan drastik terhadap permintaan dan harga minyak mentah dunia. Dalam hal ini, prestasi kewangan kebanyakan syarikat minyak dan gas global termasuk PETRONAS turut terkesan akibat pandemik ini.

3. Mengenai keadaan di Sudan, PETRONAS menekankan bahawa syarikat masih mempunyai hak milik ke atas tanah dan aset Kompleks PETRONAS di Khartoum yang diperolehi berlandaskan perundangan yang sah. Dalam hal ini, Kementerian Luar Negeri (Wisma Putra) telah bekerjasama dengan PETRONAS untuk menyelesaikan isu ini dengan Kerajaan Sudan menerusi saluran diplomatik dua hala.

4. Walau bagaimanapun, memandangkan isu ini masih berlarutan dan belum dapat diselesaikan, PETRONAS telah memfailkan permintaan bagi proses timbang tara di *International Center of Settlement of Dispute* (ICSID). Kerajaan tidak dapat memberikan maklumat lanjut mengenai isu ini memandangkan proses perundangan masih dalam pelaksanaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN [HANG TUAH
JAYA]**

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan apakah Suruhanjaya Siasatan Diraja akan diwujudkan untuk menyiasat Kertas Pandora yang telah didedahkan oleh International Consortium of Investigative Journalist yang membabitkan wang sebanyak RM1.8 trilion.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Secara dasarnya penggunaan akaun luar pesisir bukanlah satu kesalahan di bawah undang-undang Malaysia dan tindakan akan diambil sekiranya terdapat bukti berkaitan salah laku jenayah mana-mana individu atau syarikat.
2. Struktur Kewangan Malaysia dikendalikan oleh Bank Negara Malaysia melalui Akta Perkhidmatan Kewangan 2013 [Akta 758], Akta Perkhidmatan Kewangan Islam 2013 [Akta 759] dan Akta Perniagaan Perkhidmatan Wang 2011 [Akta 731]. Aktiviti penguatkuasaan dan pematuhan transaksi wang ke luar negara adalah tertakluk di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2021 (AMLA) [Akta 613] dan akta berkaitan yang merangkumi langkah pencegahan terhadap kegiatan pengubahan wang haram, pembiayaan keganasan, pemindahan dana melalui saluran tidak rasmi dan pengisytiharan mata wang di pintu masuk keluar negara.
3. Sekiranya institusi kewangan mengesyaki sesuatu transaksi melibatkan hasil aktiviti haram, pengubahan wang haram atau pembiayaan keganasan, institusi kewangan hendaklah membuat laporan transaksi yang mencurigakan (suspicious transaction report, STR) kepada Bank Negara Malaysia (BNM). Ini membolehkan maklumat dikemukakan kepada agensi penguatkuasaan bagi membuat siasatan lanjut terhadap transaksi dan mana-mana orang yang terlibat, dan seterusnya mengambil tindakan penguatkuasaan yang sewajarnya. Tindakan siasatan dan penguatkuasaan adalah dijalankan oleh agensi penguatkuasaan yang berkenaan, tertakluk kepada elemen-elemen kesalahan dan bidang kuasa perundangan.

4. Aktiviti penguatkuasaan dan pematuhan transaksi wang keluar negara adalah tertakluk di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (AMLA) [Akta 613] dan akta-akta berkaitan yang merangkumi langkah pencegahan terhadap kegiatan pengubahan wang haram, pembiayaan keganasan, pemindahan dana melalui saluran tidak rasmi dan pengisytiharan mata wang di pintu masuk/keluar negara.
5. AMLA dikuatkuasakan oleh agensi-agensi penguatkuasaan seperti Polis Diraja Malaysia (PDRM), Suruhanjaya Pencegahan Rasuah Malaysia (SPRM), Jabatan Kastam Diraja Malaysia (JKDM), Lembaga Hasil Dalam Negeri (LHDN), Bank Negara Malaysia (BNM) sebagai pihak berkuasa berwibawa (*competent authority*) di bawah AMLA sentiasa bersedia memberi bantuan dan sokongan kepada agensi-agensi tersebut.
6. Selain itu, BNM juga telah meningkatkan pemantauan dan perisikan dalam mengesan aktiviti kiriman wang tanpa lesen. Manakala, aktiviti penyelarasan dan aktiviti penguatkuasaan bersama telah dilaksanakan terutamanya melalui National Anti-Financial Crime Centre (NFCC), penguatkuasaan dan kawalan sempadan termasuk pemantauan aliran tunai tidak sah.
7. Manakala aktiviti kewangan luar pesisir Malaysia dikawal selia oleh *Labuan Financial Services Authority* (Labuan FSA) melalui penguatkuasaan Akta Perkhidmatan Kewangan dan Sekuriti Labuan 2010 [Akta 704] dan Akta Perkhidmatan Kewangan dan Sekuriti Islam Labuan 2010 [Akta 705]. Aktiviti penyelarasan dan aktiviti penguatkuasaan bersama juga telah dilaksanakan terutama melalui *National Anti-Financial Crime Centre* (NFCC), penguatkuasaan dan kawalan sempadan termasuk pemantauan.
8. SPRM sedang dalam penelitian berkenaan isu ini dan tindakan siasatan akan dilaksanakan sekiranya terdapat bukti yang menunjukkan bahawa berlakunya aktiviti pengubahan wang haram oleh individu-individu yang dikaitkan dengan Pandora Papers ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. WAN AZIZAH WAN ISMAIL
[PANDAN]**

TARIKH : 13 DISEMBER 2021 (SELASA)

SOALAN

Minta **PERDANA MENTERI** menyatakan sama ada matlamat purata pendapatan isi rumah sebanyak kira-kira RM10,000 pada tahun 2025 akan dicapai melalui strategi menaikkan gaji yang hanya akan meningkatkan kadar inflasi atau melalui strategi menaikkan produktiviti dan pelaburan baharu, dan nyatakan strategi yang dirancang.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan menyasarkan purata pendapatan isi rumah di bawah RMKe-12 meningkat daripada RM7,160 pada tahun 2020 kepada RM10,065 pada tahun 2025, iaitu peningkatan sebanyak 7.0% setahun. Sasaran yang ditetapkan ini adalah realistik berdasarkan kepada pencapaian peningkatan purata pendapatan isi rumah bagi tempoh 2009-2019 iaitu sebanyak 7.0% setahun. Selain itu, sasaran yang ditetapkan juga adalah selari dengan jangkaan pertumbuhan KDNK pada harga

semasa sebanyak 7.4% setahun bagi tempoh RMKe-12 dan matlamat untuk menjadi negara berpendapatan tinggi.

2. Kerajaan yakin sasaran yang telah ditetapkan ini mampu dicapai berikutan pelbagai strategi makro yang diperkenalkan untuk memulih dan memperkukuh asas ekonomi. Antaranya termasuk usaha untuk meningkatkan produktiviti, menggalakkan pelaburan berkualiti, mempercepat peralihan struktur ekonomi, memanfaatkan penyertaan dalam rantaian nilai global (GVC), meningkatkan bahagian pampasan pekerja (CE) dan memastikan kemampanan fiskal dalam jangka panjang.

3. Selain itu, peranan sektor swasta akan terus diperkasakan supaya kembali menjadi pemacu utama pertumbuhan ekonomi. Bagi memperkukuhkan peranan sektor swasta, Dasar Aspirasi Pelaburan Nasional (NIA) akan menjadi asas pembaharuan yang komprehensif dalam semua inisiatif dan dasar berkaitan pelaburan. Melalui NIA, pendekatan yang holistik dan bersasar akan diterapkan bagi menarik lebih banyak pelaburan langsung asing serta pelaburan langsung domestik. Institusi pelaburan akan distruktur semula untuk menarik lebih banyak pelaburan berkualiti yang akan menggalakkan pembangunan produk dan perkhidmatan yang kompleks serta mendorong penerimgunaan teknologi termaju. Ini akan mewujudkan pekerjaan berkemahiran dan berpendapatan tinggi sekaligus akan meningkatkan pendapatan pekerja dan isi rumah.

Tuan Yang di-Pertua,

4. Kerajaan sentiasa memantau dengan rapi kesan peningkatan pendapatan terhadap kenaikan harga bagi memastikan tidak berlaku tekanan kepada kos sara hidup. Objektif Kerajaan adalah untuk mencapai pertumbuhan ekonomi yang berkualiti dalam persekitaran harga yang stabil. Bagi tempoh Januari-September 2021, Indeks Harga Pengguna meningkat sebanyak 2.2% (Januari-September 2020: -1.0%). Di bawah RMKe-12, inflasi dijangka kekal stabil pada paras yang rendah, iaitu pada purata sebanyak 2.7% setahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG [ISKANDAR PUTERI]

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan berapa perbelanjaan yang telah dikeluarkan untuk menampung kos perkhidmatan peringatan SOP PKP melalui SMS secara pukal yang dijalankan oleh pihak MKN.

JAWAPAN

**DIJAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Kerajaan sentiasa komited untuk menyampaikan maklumat serta mengingatkan rakyat untuk membendung penularan Covid-19 dan menggalakkan pematuhan kepada SOP. Sehubungan itu, pelbagai saluran telah digunakan merangkumi media sosial, TV, radio dan sistem khidmat pesanan ringkas (SMS) bagi memastikan semua rakyat Malaysia mendapat maklumat secukupnya walau di mana mereka berada.

2. Hebahan Pesanan Khidmat Awam (PKA) melalui SMS kepada orang ramai bagi menyampaikan maklumat serta khidmat nasihat berkaitan pengurusan pandemik COVID-19 telah dilaksanakan Suruhanjaya Komunikasi dan Multimedia Malaysia (MCMC) dengan kerjasama Majlis Keselamatan Negara, Jabatan Perdana Menteri (MKN, JPM), Kementerian Kesihatan Malaysia (KKM) dan 13 penyedia perkhidmatan telekomunikasi (Celcom, Digi, Maxis, UMobile, ALTEL, Webe, Tune Talk, Pavocomms, YTL, XOX, Redtone, Red One dan Merchantrade).

3. Bagi perkhidmatan PKA melalui SMS ini, kesemua 13 penyedia perkhidmatan telekomunikasi tidak mengenakan sebarang caj untuk perkhidmatan SMS ini (kadar sifar) atas dasar tanggungjawab sosial korporat.

4. Kerajaan amat menghargai dan berterima kasih kepada semua kesemua 13 penyedia perkhidmatan telekomunikasi tersebut dan menghargai usaha murni syarikat-syarikat ini dalam membantu kerajaan menghadapi pendemik COVID-19. Kerajaan berharap kerjasama sebegini dapat diteruskan lagi pada masa akan datang terutamanya dalam menyampaikan maklumat yang tepat dan sahih kepada rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan senarai terperinci nama, tempoh pelantikan dan gaji bulanan untuk semua Penasihat Khas serta Duta Khas bertaraf Menteri atau tidak bertaraf Menteri kepada Perdana Menteri dilantik untuk setiap pentadbiran Perdana Menteri Pertama, ke-2, 3, 4, 5, 6, 7, 8 dan ke-9.

JAWAPAN**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)****Tuan Yang Di Pertua,**

1. Semenjak YAB Perdana Menteri Ke-4 hingga YAB Perdana Menteri Ke-9, seramai 42 Penasihat Khas dan Utusan kepada YAB Perdana Menteri telah dilantik. Berikut merupakan perincian lantikan berkenaan:

PENTADBIRAN PERDANA MENTERI KE-9 (21 OGOS 2021 – KINI)

Bil.	Nama & Jawatan	Tempoh	Gaji Bulanan (RM)
1.	YB Dato' Seri Haji Abdul Hadi bin Awang Utusan Khas Perdana Menteri Ke Timur Tengah	01/09/2021 – 31/08/2023	27,227.20
2.	YB Dato' Seri Tiong King Sing Utusan Khas Perdana Menteri Ke Republik Rakyat China	01/09/2021 – 31/08/2023	27,227.20
3.	YB Dato' Sri Richard Riot Anak Jaem Utusan Khas Perdana Menteri Ke Jepun, Republik Korea dan Taiwan	01/09/2021 – 31/08/2023	27,227.20
4.	YB Tan Sri Dato' Sri Vigneswaran a/l Sanasee Utusan Khas Perdana Menteri Ke India dan Asia Selatan	11/10/2021 – 10/10/2023	27,227.20

Bil.	Nama & Jawatan	Tempoh	Gaji Bulanan (RM)
5.	YB Dato' Sri Azalina binti Dato' Othman Said Penasihat Khas Kepada Perdana Menteri (Undang-Undang dan Hak Asasi Manusia)	1/10/2021 – 30/09/2023	27,227.20

PENTADBIRAN PERDANA MENTERI KE-8 (1 MAC 2020 – 21 OGOS 2021)

Bil.	Nama & Jawatan	Tempoh	Gaji Bulanan (RM)
1.	YB Dato' Seri Haji Abdul Hadi bin Awang Utusan Khas Perdana Menteri Ke Timur Tengah	01/04/2020 – 31/08/2021	27,227.20
2.	YB Dato' Seri Tiong King Sing Utusan Khas Perdana Menteri Ke Republik Rakyat China	01/04/2020 – 31/08/2021	27,227.20
3.	YB Tan Sri Dr. Jemilah binti Mahmood Utusan Khas Kepada Perdana Menteri (Kesihatan Awam)	01/04/2020 – 21/08/2021	18,204.67
4.	YB Dato' Sri Richard Riot Anak Jaem Utusan Khas Perdana Menteri Ke Jepun, Republik Korea dan Taiwan	01/06/2020 – 31/08/2021	27,227.20
5.	YB Dato' Seri Ahmad Faizal bin Azumu Penasihat Khas YAB Perdana Menteri	1/08/2021 – 21/08/2021	27,227.20

PENTADBIRAN PERDANA MENTERI KE-7 (10 MEI 2018 – 24 FEB 2020)

Bil.	Nama & Jawatan	Tempoh	Gaji Bulanan (RM)
1.	YB Datuk Abdul Kadir bin Jasin Utusan Khas Kepada Perdana Menteri (Media dan Komunikasi)	16/07/2018 – 01/04/2020	9,038.00
2.	YB Tuan Tan Kok Wai Utusan Khas Malaysia Kr Republik Rakyat China	25/07/2018 – 11/03/2020	18,204.67
3.	Dr. Muhammed bin Abdul Khalid Penasihat Ekonomi Kepada YAB Perdana Menteri	27/08/2018 – 01/04/2020	19,610.33
4.	YBhg. Tun Abdul Daim Zainuddin Utusan Khas YAB Perdana Menteri	13/02/2019 – 24/02/2020	Tidak menerima gaji

PENTADBIRAN PERDANA MENTERI KE-6 (3 APRIL 2009 – 9 MEI 2018)

Bil.	Nama & Jawatan	Tempoh	Gaji Bulanan (RM)
1.	YBhg. Dato' Seri Shahidan bin Kassim Penasihat Khas Kepada Perdana Menteri (Wilayah Ekonomi Koridor Utara)	22/09/2010 – 21/09/2012	23,020.00
2.	YBhg. Dato' Seri S. Samy Vellu Duta Khas Ke India dan Asia Selatan Dalam Bidang Infrastruktur)	01/01/2012 – 18/05/2018	27,227.20
3.	YBhg. Dato' Seri Dr. Abdullah bin Md. Zain Penasihat Agama Kepada Perdana Menteri	02/02/2013 – 24/05/2018	25,106.00
4.	YBhg. Dato' Wira Mohd Johari bin Baharum Penasihat Khas Kepada Perdana Menteri (Wilayah Ekonomi Koridor Utara)	27/05/2013 – 29/07/2015	21,500.00
5.	YBhg. Dato' Sri Jamaludin bin Mohd. Jarjis Penasihat Kepada Perdana Menteri Ke Amerika Syarikat	01/07/2013 – 04/04/2015	27,227.20
6.	YBhg. Tan Sri Dato' Seri Utama Rais Yatim Penasihat Hal Ehwal Sosial dan Kebudayaan Kepada Kerajaan Malaysia	01/07/2013 – 18/05/2018	27,227.20
7.	YBhg. Dato' Sri Shahrizat binti Abdul Jalil	01/09/2013 – 18/05/2018	27,227.20

Bil.	Nama & Jawatan	Tempoh	Gaji Bulanan (RM)
	Penasihat Pembangunan Keusahawanan dan Ikhtisas Wanita		
8.	YBhg. Tan Sri Ong Ka Ting Duta Khas Perdana Menteri Ke Republik Rakyat China	01/11/2013 – 31/12/2017	Tidak menerima gaji
9.	YBhg. Dato' Seri Ting King Sing Duta Khas Perdana Menteri Ke Asia Timur	01/01/2014 – 18/05/2018	27,227.20
10.	YBhg. Datuk Seri Shaziman bin Abu Mansor Penasihat Kepada Jabatan Perdana Menteri	22/05/2015 – 24/05/2018	21,500.00
11.	YBhg. Datuk Heng Seai Kie Penasihat Hal Ehwal Perpaduan Negara dan Integrasi Nasional, Jabatan Perdana Menteri	08/07/2015 – 24/05/2018	14,847.65
12.	YBhg. Dato' Sri Idris Jala Penasihat Program Transformasi Nasional	01/09/2015 – 18/05/2018	Tidak menerima gaji
13.	YBhg. Dato' Seri Haji Zainal Abidin Osman Penasihat Khas Kepada Perdana Menteri (Wilayah Ekonomi Koridor Utara)	01/09/2015 – 24/05/2018	21,500.00

Bil.	Nama & Jawatan	Tempoh	Gaji Bulanan (RM)
14.	YBhg. Dato' Sri Shahrizat binti Abdul Jalil Penasihat Pembangunan Keusahawanan dan Ikhtisas Wanita	01/09/2013 – 18/05/2018	27,227.20
15.	YBhg. Prof. Emeritus Tan Sri Dato' Sri Paduka Dr. Lim Kok Wing Utusan Khas Perdana Menteri Ke Negara-Negara Southern African Development Community	01/05/2016 – 30/04/2018	Tidak menerima gaji
16.	YBhg. Tan Sri Dato' Sri Khalid bin Abu Bakar Duta Khas Bagi Meningkatkan Hubungan dan Kerjasama Negara Dengan Masyarakat Antarabangsa Dalam Usaha Memerangi Keganasan, Fahaman Pelampau dan Pmerdagangan Manusia	05/09/2017 – 18/05/2018	25,702.00

PENTADBIRAN PERDANA MENTERI KE-5 (31 OKT 2003 – 3 APR 2009)

Bil.	Nama & Jawatan	Tempoh	Gaji Bulanan (RM)
1.	YBhg. Datuk Seri Panglima Dr. Abdul Hamid bin Othman Penasihat Agama Islam Kepada YAB Perdana Menteri	31/10/2003 – 01/02/2009	17,820.00

PENTADBIRAN PERDANA MENTERI KE-4 (16 JUL 1981 – 30 OKT 2003)

Bil.	Nama & Jawatan	Tempoh	Gaji Bulanan (RM)
1.	YM Raja Tan Sri Mohar bin Raja Badiozaman Penasihat Khas (Ekonomi) Kepada Perdana Menteri	01/01/1982 – 01/01/1989	17,820.00
2.	YBhg. Datuk Seri Panglima Dr. Abdul Hamid bin Othman Penasihat Agama Islam Kepada YAB Perdana Menteri	02/02/2001 – 30/10/2003	17,820.00

Bagi pelantikan-pelantikan yang lebih awal, tiada rekod berkaitan yang ditemui buat masa ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD.
NASIR [JOHOR BAHRU]**

TARIKH : 13 DISEMBER 2021 (ISNIN)

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **PERDANA MENTERI** menyatakan sebarang perancangan untuk menambah baik Akta Perlindungan Pemberi Maklumat 2010 dari segi meningkatkan tahap perlindungan terhadap pemberi maklumat (*whistleblowers*) bagi menjamin akauntabiliti dan tata kelola yang baik.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Akta Perlindungan Pemberi Maklumat 2010 [Akta 711] telah digubal bertujuan untuk memerangi rasuah dan salah laku lain dengan menggalakkan dan memudahkan pemberi maklumat membuat pendedahan kelakuan tidak wajar, melindungi orang yang membuat pendedahan daripada tindakan yang memudaratkan dan memastikan supaya pendedahan tersebut disiasat dan diuruskan dengan sewajarnya. Ini juga selaras dengan inisiatif yang diterajui oleh Kerajaan dengan menandatangani *United Nations Conventions Against Corruption* (UNCAC) pada 20

September 2008 di mana *state party* mempunyai komitmen untuk mengadakan undang-undang bagi memberi perlindungan kepada pemberi maklumat dan tindakan sewajarnya supaya pendedahan tersebut disalurkan kepada pihak berkuasa (Artikel 33 dan 37 UNCAC).

Sehingga kini, sebanyak tujuh (7) agensi penguatkuasa telah mengguna pakai Akta 711 ini iaitu Polis DiRaja Malaysia (PDRM), Suruhanjaya Pencegahan Rasuah Malaysia (SPRM), Jabatan Kastam DiRaja Malaysia (JKDM), Jabatan Imigresen Malaysia (JIM), Jabatan Pengangkutan Jalan Malaysia (JPJ), Suruhanjaya Syarikat Malaysia (SSM) dan Suruhanjaya Sekuriti Malaysia (SC).

Cadangan pindaan dan penambahbaikan Akta 711 ini juga merupakan salah satu inisiatif di bawah Pelan Antirasuah Nasional (NACP) Bagi Tahun 2019-2023 iaitu di bawah Strategi 5: Menginstitusikan Kredibiliti Agensi Penguatkuasaan Undang-undang dan Objektif Strategik 5.3: Memperkukuh Agensi Penguatkuasaan undang-undang. Pelaksanaan inisiatif di bawah NACP ini disasarkan untuk dilaksanakan dalam tempoh Januari 2021 hingga 2023.

Beberapa sesi libat urus dengan pihak pemegang taruh telah diadakan termasuk sesi libat urus dengan pihak *United Nations Office on Drugs and Crime* (UNODC). Di samping itu juga, satu Jawatankuasa Kerja telah ditubuhkan bagi menilai, mengkaji serta menetapkan parameter berdasarkan cadangan pindaan dan penambahbaikan yang telah diterima daripada pelbagai pihak berkepentingan. Tujuh (7) isu yang berkaitan dengan Akta 711 telah dikenal pasti untuk diberi keutamaan dalam proses penambahbaikan akta tersebut seperti berikut:

- i. Definisi “Kelakuan tidak Wajar” di bawah Seksyen 2 Akta 711 adalah terlalu luas dan tidak jelas. Kajian mendapati bahawa tiada sekatan atau perbezaan di antara salah laku umum dengan salah laku yang serius.
- ii. Akta 711 tidak mengiktiraf mekanisme aduan dalaman yang diwujudkan dalam sesebuah organisasi “bukan agensi penguat kuasa” untuk diterima sebagai saluran pendedahan kelakuan

tidak wajar yang sah dan diterima di bawah Akta 711. Akta 711 memperuntukkan bahawa pendedahan kelakuan tidak wajar hanya boleh dibuat kepada agensi penguat kuasa dan tidak dibenarkan untuk dikongsi dengan mana-mana pihak ketiga.

- iii. Tiada pengurusan secara berpusat atau pihak berkuasa tunggal yang bertanggungjawab dalam memberi perlindungan kepada pemberi maklumat di Malaysia. Pada masa kini, Malaysia melaksanakan model tidak berpusat di mana perlindungan pemberi maklumat adalah dikendalikan oleh Agensi Penguatkuasaan sendiri.
- iv. Terdapat percanggahan di antara Seksyen 6 Akta Perlindungan Pemberi Maklumat 2010 dan Seksyen 203A (1) dan (2) Kanun Keseksaan. Seksyen 203A Kanun Keseksaan memperuntukkan mana-mana pihak yang didapati mendedahkan mana-mana maklumat yang diperoleh olehnya sewaktu menjalankan tugas merupakan suatu kesalahan. Namun, Akta Perlindungan Pemberi Maklumat 2010 (APPM) membenarkan pendedahan sesuatu kelakuan tidak wajar yang diketahui sewaktu seseorang menjalankan tugas, sama ada oleh pegawai badan awam, atau badan swasta. Perkara ini menimbulkan kekeliruan seolah-olah terdapat percanggahan dalam undang-undang. Perkara ini seterusnya membawa kepada dilema dari sudut undang-undang dan moral kepada pemberi maklumat sekiranya ia berhasrat untuk membuat sesuatu pendedahan. Ini termasuklah sekatan yang diperuntukkan di bawah undang-undang bertulis lain seperti Akta Perlindungan Data Peribadi 2010, Akta Rahsia Rasmi 1972, Akta Perkhidmatan Kewangan 2013 dan sebagainya.
- v. Terdapat percanggahan Seksyen 8 dan Seksyen 14 Akta 711. Siasatan “Tindakan Yang Memudaratkan” pada kebiasaannya akan mendedahkan identiti Pemberi Maklumat. Seksyen 8 memperuntukkan bahawa pendedahan identiti Pemberi Maklumat merupakan suatu kesalahan di bawah Akta ini. Di samping itu, Seksyen 14 pula memperuntukkan kuasa kepada Agensi Penguat kuasa menjalankan siasatan berhubung “Tindakan Yang Memudaratkan” apabila menerima aduan

daripada Pemberi Maklumat. Ini menimbulkan dilema kepada Agensi Penguat kuasa kerana Agensi Penguat kuasa perlu memaklumkan asas menjalankan sesuatu siasatan kepada pihak yang disiasat.

- vi. Seksyen 11(1)(a) memperuntukkan bahawa agensi penguatkuasaan boleh membatalkan perlindungan pemberi maklumat jika berdasarkan penyiasatan didapati bahawa pemberi maklumat itu sendiri telah menyertai kelakuan tidak wajar yang didedahkan itu; dan
- vii. Seksyen 26 Akta 711 tidak memperuntukkan kaedah serta skala pengiraan ganjaran.

Tujuh (7) isu ini masih dalam kajian dan penelitian Jawatankuasa Kerja Pindaan Akta 711. Hasil kajian dan parameter bagi cadangan penambahbaikan Akta 711 dijadual akan dibentangkan kepada Jemaah Menteri pada Disember 2021.

Dalam hal ini, Kerajaan amat mengalu-alukan sebarang cadangan dan maklum balas daripada pelbagai pihak berhubung Akta 711. Ini bagi memastikan cadangan pindaan Akta 711 ini dapat menambah baik pelaksanaan perlindungan pemberi maklumat dan seterusnya mengekang kes salah laku dan rasuah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 13 DISEMBER 2021 (ISNIN)

SOALAN

PUAN VIVIAN WONG SHIR YEE [SANDAKAN] minta **PERDANA MENTERI** menyatakan dengan terperinci senarai projek-projek di daerah Sandakan yang gagal disiapkan di bawah Rancangan Malaysia Ke-11 dan apakah pula status projek-projek ini di bawah RMK-12.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, tempoh pelaksanaan sesuatu projek yang telah diluluskan tidak dihadkan dalam tempoh satu tahun Rancangan Malaysia Lima Tahun (RMLT). Tempoh pelaksanaan projek adalah berkait rapat dengan prestasi kemajuan projek dan kemampuan kontraktor yang dilantik. Sekiranya projek tersebut tidak dapat disiapkan dalam tempoh sesuatu RMLT, pelaksanaannya akan diteruskan dalam RMLT berikutnya sebagai projek sambungan.
2. Untuk makluman Yang Berhormat, terdapat beberapa projek tidak dapat disiapkan dalam tempoh Rancangan Malaysia Kesebelas (RMKe-

11). Projek-projek tersebut akan dilaksanakan sebagai projek sambungan di bawah Rancangan Malaysia Kedua Belas (RMKe-12). Antaranya projek-projek tersebut termasuklah:

- i. Pembesaran Lapangan Terbang Sandakan, Sabah;
- ii. Pembinaan Baharu Kolej Vokasional Berasrama Penuh serta Lain-Lain Kemudahan Berkaitan di Kawasan Hub Pendidikan Sandakan, Daerah Sandakan, Negeri Sabah;
- iii. Pembinaan Loji Rawatan Kumbahan dan Rangkaian Paip Pembetungan di Bandar Sandakan;
- iv. Rancangan Tebatan Banjir (RTB) Sg. Anip, Lembangan Sg. Anip, Sandakan, Sabah; dan
- v. Pembinaan Semula dan Naiktaraf Kompleks Perumahan Perhutanan Buli Sim Sim, Sandakan.

3. Kerajaan sentiasa memantau pelaksanaan projek yang diluluskan bagi memastikan ianya sentiasa mengikut jadual dan dapat disiapkan sebagaimana dirancang. Pada masa ini, terdapat pelbagai platform/taskforce diwujudkan di peringkat kementerian/negeri bagi membincangkan isu-isu pelaksanaan dan mencadangkan langkah-langkah penambahbaikan untuk menangani projek sakit/ lewat jadual. Contoh platform yang diwujudkan adalah Majlis Tindakan Pembangunan Kementerian (MTPK) dan Mesyuarat Tindakan Pembangunan Negeri (MTPNg), malah saya bersama-sama Ketua Setiausaha Negara mempengerusikan Jawatankuasa Pemudahcara dan Pemantauan Pelaksanaan Projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 13 DISEMBER 2021 (ISNIN)

SOALAN

TUAN SANISVARA NETHAJI RAYER A/L RAJAJI [JELUTONG] minta **PERDANA MENTERI** menyatakan status terkini mengenai pemansuhan hukuman gantung yang membabitkan kesalahan-kesalahan di bawah Kanun Keseksaan, Akta Senjata Api (Penalti Lebih Berat) 1971, Akta Dadah Berbahaya 1952 dan kesalahan-kesalahan jenayah lain.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, secara umumnya, Kerajaan bersedia untuk mempertimbangkan komitmen kepimpinan terdahulu bagi memansuhkan hukuman mati mandatori dan syor hukuman gantian dengan budi bicara Mahkamah. Dalam hal ini, Laporan Akhir Hukuman Gantian Terhadap Hukuman Mati Mandatori yang telah disediakan Jawatankuasa Khas Kajian Hukuman Gantian Terhadap Hukuman Mati Mandatori mengandungi antara lain, syor-syor hukuman gantian terhadap 11 kesalahan yang membawa hukuman mati mandatori, kesalahan di bawah Akta Dadah Berbahaya

1952 [Akta 234] dan 21 kesalahan yang membawa hukuman mati tetapi dengan budi bicara Mahkamah. Ini turut termasuk kesalahan-kesalahan yang diperuntukkan di bawah Kanun Keseksaan dan Akta Senjata Api (Penalti Lebih Berat) 1971.

Melalui kajian yang sama, buat julung kalinya juga polisi penghukuman dalam sistem keadilan di negara ini telah disemak dan dikaji semula. Ia merupakan penambahbaikan kepada “criminal justice system” di mana Jawatankuasa Khas telah mengesyorkan hukuman gantian yang bersifat adil dan setimpal dengan kesalahan jenayah yang telah dilakukan. Kajian ini juga telah dilaksanakan berdasarkan sesi libat urus yang menyeluruh dan komprehensif melibatkan orang awam, keluarga banduan, keluarga mangsa, agamawan Islam dan Bukan Islam, banduan, pakar akademik, CSO/NGO termasuk pandangan pakar perundangan dari luar negara.

Secara umumnya, laporan ini dijangka dibentangkan kepada Jemaah Menteri dalam masa terdekat. Sebarang tindakan susulan adalah tertakluk kepada keputusan Kerajaan berkaitan Kajian Hukuman Gantian Terhadap Hukuman Mati Mandatori dan syor-syor yang dinyatakan dalam laporan tersebut. Pertimbangan dan keputusan Kerajaan terhadap kajian ini akan turut mengambil kira kepentingan dan kemaslahatan rakyat secara keseluruhan termasuk aspek berkaitan pencegahan jenayah, kesan yang dihadapi oleh keluarga mangsa serta kesedaran kepada orang awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMKARPAL SINGH A/L
KARPAL SINGH [BUKIT GELUGOR]**

TARIKH : 13 DISEMBER 2021 (ISNIN)

SOALAN

Minta **PERDANA MENTERI** menyatakan sama ada siasatan akan dimulakan ke atas pendedahan dalam laporan Pandora Papers yang berkenaan aset-aset individu-individu Malaysia yang disimpan dalam offshore accounts yang mana dikatakan berjumlah RM1 trilion dan sekiranya tidak, apakah sebab-sebab untuk tidak menyiasat pendedahan tersebut.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Secara dasarnya penggunaan akaun luar pesisir bukanlah satu kesalahan di bawah undang-undang Malaysia dan tindakan akan diambil sekiranya terdapat bukti berkaitan salah laku jenayah mana-mana individu atau syarikat.

Struktur Kewangan Malaysia dikendalikan oleh Bank Negara Malaysia melalui Akta Perkhidmatan Kewangan 2013 [Akta 758], Akta Perkhidmatan Kewangan Islam 2013 [Akta 759] dan Akta Perniagaan Perkhidmatan Wang 2011 [Akta 731]. Aktiviti penguatkuasaan dan pematuhan transaksi wang ke luar negara adalah tertakluk di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2021 (AMLA) [Akta 613] dan akta berkaitan yang merangkumi langkah pencegahan terhadap kegiatan pengubahan wang haram, pembiayaan keganasan, pemindahan dana melalui saluran tidak rasmi dan pengisytiharan mata wang di pintu masuk keluar negara.

Sekiranya institusi kewangan mengesyaki sesuatu transaksi melibatkan hasil aktiviti haram, pengubahan wang haram atau pembiayaan keganasan, institusi kewangan hendaklah membuat laporan transaksi yang mencurigakan (suspicious transaction report, STR) kepada Bank Negara Malaysia (BNM). Ini membolehkan maklumat dikemukakan kepada agensi penguatkuasaan bagi membuat siasatan lanjut terhadap transaksi dan mana-mana orang yang terlibat, dan seterusnya mengambil tindakan penguatkuasaan yang sewajarnya. Tindakan siasatan dan penguatkuasaan adalah dijalankan oleh agensi penguatkuasaan yang berkenaan, tertakluk kepada elemen-elemen kesalahan dan bidang kuasa perundangan.

Aktiviti penguatkuasaan dan pematuhan transaksi wang keluar negara adalah tertakluk di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (AMLA) [Akta 613] dan akta-akta berkaitan yang merangkumi langkah pencegahan terhadap kegiatan pengubahan wang haram, pembiayaan keganasan, pemindahan dana melalui saluran tidak rasmi dan pengisytiharan mata wang di pintu masuk/keluar negara.

AMLA dikuatkuasakan oleh agensi-agensi penguatkuasaan seperti Polis Diraja Malaysia (PDRM), Suruhanjaya Pencegahan Rasuah Malaysia (SPRM), Jabatan Kastam Diraja Malaysia (JKDM), Lembaga Hasil Dalam Negeri (LHDN), Bank Negara Malaysia (BNM) sebagai pihak berkuasa berwibawa (*competent authority*) di bawah AMLA sentiasa bersedia memberi bantuan dan sokongan kepada agensi-agensi tersebut.

Selain itu, BNM juga telah meningkatkan pemantauan dan perisikan dalam mengesan aktiviti kiriman wang tanpa lesen. Manakala, aktiviti penyelarasan dan aktiviti penguatkuasaan bersama telah dilaksanakan terutamanya melalui National Anti-Financial Crime Centre (NFCC), penguatkuasaan dan kawalan sempadan termasuk pemantauan aliran tunai tidak sah.

Manakala aktiviti kewangan luar pesisir Malaysia dikawal selia oleh *Labuan Financial Services Authority* (Labuan FSA) melalui penguatkuasaan Akta Perkhidmatan Kewangan dan Sekuriti Labuan 2010 [Akta 704] dan Akta Perkhidmatan Kewangan dan Sekuriti Islam Labuan 2010 [Akta 705]. Aktiviti penyelarasan dan aktiviti penguatkuasaan bersama juga telah dilaksanakan terutama melalui *National Anti-Financial Crime Centre* (NFCC), penguatkuasaan dan kawalan sempadan termasuk pemantauan.

SPRM sedang dalam penelitian berkenaan isu ini dan tindakan siasatan akan dilaksanakan sekiranya terdapat bukti yang menunjukkan bahawa berlakunya aktiviti pengubahan wang haram oleh individu-individu yang dikaitkan dengan Pandora Papers ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN WONG TACK [BENTONG]

TARIKH : 13 DISEMBER 2021 (ISNIN)

SOALAN

TUAN WONG TACK [BENTONG] minta **MENTERI ALAM SEKITAR
DAN AIR** menyatakan langkah-langkah yang diambil untuk menangani
impak perubahan iklim.

JAWAPAN

Tuan Yang Di-Pertua,

1. Untuk makluman Ahli Yang terhormat, antara langkah pendekatan utama yang akan dilakukan oleh Kementerian untuk menangani impak perubahan iklim seperti yang digariskan oleh YAB Perdana Menteri semasa mempengerusikan Mesyuarat Majlis Tindakan Perubahan Iklim Bil. 1/2021 yang diadakan pada 13 April 2021 ialah:

- a. Mengukuhkan tadbir urus negara terhadap perubahan iklim melalui penglibatan semua pihak berkepentingan;
- b. Melaksanakan pelbagai program untuk mendorong agenda perubahan iklim dengan menggerakkan sumber tenaga manusia dan peruntukan kewangan;
- c. Memperkenalkan mekanisme pasaran karbon;
- d. Menjalin kerjasama dengan semua pihak berkepentingan supaya Kementerian Alam Sekitar dan Air (KASA) dapat memenuhi komitmen negara di bawah *United Nations Framework Convention on Climate Change* (UNFCCC); dan
- e. Memupuk gaya hidup hijau dalam semua lapisan masyarakat melalui konsep kesihatan planet (*planetary health*) ke arah pembangunan lestari yang holistik.

2. Seterusnya, di dalam mesyuarat mesyuarat MyCAC Bil. 2/2021 yang diadakan pada 11 Oktober 2021, antara intipati dan keputusan di dalam usaha meningkatkan menangani perubahan iklim adalah:

- a. Pengemaskinian *Nationally Determined Contributions* (NDC) yang lebih dalam memperkukuh '*ambitious*' kepada UNFCCC. Malaysia berhasrat untuk **mengurangkan intensiti pelepasan GHG merentas ekonomi sebanyak 45 peratus (berdasarkan Keluaran Dalam Negara Kasar) pada tahun 2030 berbanding tahapnya pada tahun 2005**. Pengurangan

intensiti tersebut dibuat tanpa syarat (*unconditional*) dan 10 peratus lebih tinggi daripada sasaran sebelum ini;

- b. Aspirasi negara untuk **mencapai pelepasan GHG bersih sifar (*net-zero GHG emissions*) seawal-awalnya pada tahun 2050**. Pencapaian sasaran ini adalah tertakluk kepada hasil kajian strategi jangka masa panjang pembangunan rendah karbon (*Long-Term Low Emissions Development Strategy* (LT-LEDS)) yang akan dimuktamadkan pada akhir tahun 2022 oleh KASA.
- c. Pelaksanaan **Skim Perdagangan Karbon Domestik** oleh KASA dengan kerjasama Kementerian Kewangan dan Bursa Malaysia Berhad. Ini akan melibatkan pembangunan platform tunggal bagi transaksi kredit karbon di peringkat domestik. Platform ini berpotensi menarik pelaburan rendah karbon ke dalam negara, meningkatkan daya saing produk keluaran Malaysia di peringkat antarabangsa dan menjana sumber kewangan mampan kepada entiti dalam negara.
- d. Meningkatkan penjanaan tenaga boleh baharu, **sasaran perolehan 100% kenderaan Kerajaan yang bukan berasaskan enjin pembakaran dalaman (*non-internal combustion engine* (ICE)) pada 2030**, mengekalkan sekurang-kurangnya 50% litupan hutan negara, menggalakan 'zero waste' dan kitar semula serta pembangunan bandar rendah karbon melalui Pelan Induk Bandar Rendah Karbon.
- e. **mengambil kira faktor perubahan iklim dalam rekabentuk kejuruteraan sistem infrastruktur** berkaitan air bagi memastikan pengurusan air secara lestari;
- f. Menggalakkan lebih banyak **pihak swasta menjadikan aspirasi pelepasan GHG bersih sifar** dalam agenda kelestarian operasi syarikat.

- g. memperkukuhkan tadbir urus perubahan iklim negara, antaranya melalui **penubuhan Pusat GHG Kebangsaan di bawah KASA**.

Tuan Yang Di-Pertua,

3. Sebagaimana yang telah dilaporkan dalam Laporan Komunikasi Kebangsaan yang Ketiga (NC3), negara mengalami tiga impak utama akibat daripada kesan perubahan iklim iaitu kejadian banjir yang lebih ekstrem, kemarau panjang dan kenaikan aras laut. Bagi mengurangkan impak perubahan iklim selain mengekalkan kelestarian pembangunan sosioekonomi negara, Kerajaan telah dan akan melaksanakan pelbagai langkah mitigasi dan adaptasi secara menyeluruh dan bersepadu.

4. Kerajaan sentiasa proaktif dan mengambil pendekatan berperingkat atau '*stepwise approach*' dalam menangani impak perubahan iklim. Ke arah itu, kerajaan sedang dalam proses membangunkan Pelan Tindakan Adaptasi Kebangsaan (NAP). NAP dijangka disiapkan pada tahun 2025 dan akan mengandungi perancangan tindakan adaptasi secara menyeluruh merangkumi lima (5) sektor utama iaitu:

- a. Keselamatan air dan sumber air (*Water security and water resources*);
- b. Pertanian dan keselamatan makanan (*Agriculture and food security*);
- c. Infrastruktur, tenaga dan persekitaran terbina (termasuk bandaraya) (*Infrastructure, energy and built environment (include cities)*);
- d. Perhutanan dan Biodiversiti (*Forestry and biodiversity*); dan
- e. Kesihatan awam (*Public health*).

5. Untuk makluman Ahli Yang Berhormat, KASA melalui NAHRIM juga telah menyediakan panduan pelaksanaan adaptasi perubahan iklim melalui penerbitan *Climate Change Adaptation Framework for Water Sector* atau Kerangka Adaptasi Kebangsaan (NAF) yang akan memantapkan pelaksanaan adaptasi perubahan iklim di Malaysia. Penggunaan teknologi *Machine Learning* (ML), *Artificial Intelligence* (AI) dan *Big Data Analytic* (BDA) akan terus dipertingkatkan dalam pengurusan banjir dan kemarau.

6. NAHRIM dengan kerjasama MAMPU (Unit Pemodenan Tadbiran dan Perancangan Pengurusan Malaysia) juga telah memperkenalkan platform ICT pertama di negara ini berasaskan BDA iaitu *NAHRIM Hydroclimate Data Analytic Accelerator* (NHyDAA) pada 2018 yang membolehkan unjuran *uncover pattern* hujan di masa hadapan. Berasaskan pengalaman ini, projek kedua BDA iaitu *Malaysian Adaptation Index* (MAIN) yang berupaya memaklumkan tahap ketersediaan adaptasi setiap negeri di Malaysia bagi menghadapi kesan perubahan iklim dijangka diperkenalkan dalam tahun ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 13 DISEMBER 2021 (ISNIN)

SOALAN :

DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan apakah status Amanah Ikhtiar Malaysia (AIM) dan berapa jumlah dana yang Kerajaan telah berikan kepada AIM sejak penubuhan AIM sampai sekarang mengikut negeri dan wilayah.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Amanah Ikhtiar Malaysia (AIM) adalah suatu pemerbadanan pemegang amanah yang diperbadankan pada 17 September 1987 untuk membantu isi rumah termiskin dengan menyediakan skim pinjaman mikro kredit. Dana skim mikro kredit AIM telah dibiayai melalui 8 perjanjian pinjaman Kerajaan Persekutuan tanpa faedah kepada AIM berjumlah RM857.97 juta mulai tahun 1998 sehingga tahun 2011. Selain itu, AIM turut menerima geran Kerajaan Persekutuan berjumlah RM377.24 juta pada tahun 2010 sehingga 2015 bagi melaksanakan pelbagai fungsi menjadikan jumlah keseluruhan dana Kerajaan yang diterima oleh AIM sebanyak RM1,235.21 juta. Setakat 31 September 2021, baki pinjaman belum selesai AIM dengan Kerajaan adalah sebanyak RM612.2 juta.

Berhubung dana peruntukan Kerajaan yang diterima AIM, penyaluran peruntukan dana dibuat terus kepada AIM. Ketetapan pengagihan dana mengikut negeri dan wilayah adalah ditentukan oleh AIM sendiri berdasarkan permohonan yang diterima. Sehingga kini, skim mikro kredit AIM telah dimanfaatkan oleh 369,400 peminjam yang dikenali sebagai Sahabat.

Sekian, terima kasih.